

## Romanos

### *Pablo Romoca ošbuáchiyënga jacheuayama*

<sup>1</sup> Atše Pablo, Jesucristbe oservená, quem tsbuanácha sentsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

<sup>2</sup> Ya bayté entsemna, Bëngbe Bëtsá chabe juabna oyebuambnayëngaftaca chë tšabe noticiënga entšanga tojanašebuachená, y chënga chca tmojëftsanábema Bëngbe Bëtsabe uabemana palabrënguiñe.

<sup>3-4</sup> Chë tšabe noticiëngna, chabe Uaquiñá Bëngbe Utabná Jesucristbiamá jtsóyebuambnayana. Entšá quetsomñecana, tojanonýná canýe rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanýé Jesucristo chabe Uaquiñá bëtsemnama. Cha chca tojaninýanýé chë Uaquiñá cháuatayenama cha tojanma ora.

<sup>5</sup> Chábeyeca, Bëngbe Bëtsá atše canýe bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyëts luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama.

<sup>6-7</sup> Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tcmojáchembo

Jesucrístbenga chašmotsemnama. Atše tšëngaftangbiamá sentsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše sentsaimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebomnama.

*Pablo tša inaboše Roma bëts puebloje jama*

<sup>8</sup> Jabojátšamna, Bëngbe Bëtsá, Jesucristbiajana šcuatschuá, cada ona tšëngaftanguentsabiamá, er nyets quem luariñe entšanga tša monjesoyebuambná tšëngaftanga Jesucrístbeñe bëtsá šmojtsošbuáchema.

<sup>9</sup> Bëngbe Bëtsá, nda nyets ainánaca sëndëserveda, tšabe noticiënga chabe Uaquiñabiamá abuayiynayiñe, endëtatšëmbo atše nyets tempo Bëngbe Bëtsáftaca stsencuénta ora, tšëngaftangbiamá sëndëtseimpadanama;

<sup>10</sup> y mora Bëngbe Bëtsá sëntseimpadana, nya mora y cha tojtsebošëse, chašolesenciá jama tšëngaftanga jautsëtsayama.

<sup>11</sup> Er atše tša sënjëseboše tšëngaftanga jányama, chca, atše chayobená jamama chë Uámana Espíritbentsána yóbocana tšabe soyënga tšëngaftanga chašmotsebomnama; y chca, tšëngaftanga ainaniñe bëts añemo chašmotsebomnama, y Jesucrístbeñe corente chašmotsošbuáchema;

<sup>12</sup> o más tšabá jayanamna, tšëngaftanga y átšeftaca mochjenájabuache ainaniñe bëts añemo

jtsebomnama, tšëngaftanga y átsnaca Jesucristbeñe tša imošbuachéyeca.

13 Y morna, Jesucristbeyeca catšátanga, séntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero méntscoñama ndoñe tsjobenaye. Atše séntseboše ndayá chayobená jamana ínÿenga tšëngaftangbioca Jesucristbeñe chamotsošbuáchema, ntšamo ínÿengbeñe ndoñe judiëngbeñe tonjopasacá.

14 Atše Jesucristbiana canÿe oservená sëndmëna, y chíyeca nÿetscángaftaca obligaciónaca séntsemna, chë pueblënguiñe oyenëngaftaca y bën tjoye oyenëngaftaca, chë uatsjinÿenëngaftaca y ndoñe chcangaftácnaca.

15 Chíyeca atše tša séntseboše tšëngaftanga chë Romoca šmoyenëgnaca chë tšabe noticiënga jábuayenama.

*Chë tšabe noticiënga Bëngbe Bëtsabe obenana jtsinÿanÿayana*

16 Atše ndoñe quetsátëuatja chë tšabe noticiënga jtsabuayiynayama, er chë noticiënga jtsinÿanÿayana Bëngbe Bëtsabe obenana; y chë obenánaca, nÿetscanga Jesucristbeñe ošbuáchiyënga jtsobenana atsebácanënga jtsemnama, natsana chë judiënga chca ošbuáchiyënga, pero chë ndoñe judiëngnaca.

17 Er chë tšabe noticiënga jtsinÿanÿayana ntšamo Bëngbe Bëtsá inétsama entšanga chabe bominiñe tšábenga chamotsemnama. Y entšanga chabe bominiñe tšábenga jábiamana, chënga Jesucristbeñe tmojtsošbuáchema. Ntšamo Bëngbe

Bëtsabe uabemana palabrënguifne endayancá: “Nÿe ndabiana Bëngbe Bëtsá tojama chabe bominyifne tšabia chaotsemnama, cha Bëngbe Bëtsábeñe betsošbuáchema, cha ndegombre chë nÿetsca tescama yomna tšabe vida echántsebomna ca.”

*Bëngbe Bëtsabe delante nÿetscanga culpa bomnënga mondmëna*

<sup>18</sup> Bëngbe Bëtsá celocana tojinÿanyé, chë uabouana castigo, tša tbojetnama entsangbiana chaotsemnama, ainaniñe bacna juabnënga bomnëngbiana y chë bacna soyënga amëngbiana y ndëmuanÿengbiana, masque Bëngbe Bëtsabe ndegombre soyënga jtsotatsëmbñana, tša bacna soyënga tmojtsama causa, ndoñe ntjalesénciana cachënga jtsiyenama ntšamo ndegombre yomncá.

<sup>19</sup> Bëngbe Bëtsá echanjácastigaye, er ntšamo entsanga imobencá Bëngbe Bëtsabiana jtsetatsëmbuama soye, chëngaftaca sempre endétsemna. Y chca endmëna, Bëngbe Bëtsá chë soye tojinÿanyéyeca.

<sup>20</sup> Bëngbe Bëtsá quem luare tojanma orscana, entsanga mondetsobena botamana josértana, Bëngbe Bëtsabe obenana ndocna te yochjëftsopochócama y cha ndegombre Bëngbe Bëtsá yomnama. Chë soyënga Bëngbe Bëtsabiana entsanga quemuátobena jinÿana; nÿe jtsetatsëmbuamna aíñe. Entšanga mondobena chë soyënga Bëngbe Bëtsabiana jtsetatsëmbuana, cachá tojanma soyëngaca. Chcasna, chënga ndoñe quemuátobena jayanana bacna soye tmojama, cha nduabuatma causa ca.

21 Chënga Bëngbe Bëtsabiana mondétatšëmbo, pero ndoñe ntsebošana chábioye jadórana, “aca ndegombre Bëngbe Bëtsá condmëna ca” jtsichámëse, ni cha ntsatschuanayana. Pero, ntšamo chënga tmojtsejuabnacá tondaye ntsámanana; ndoservena juabnéngaca y bacna juabnéngaca montsiyena, y chca, chënga montsiyena, jtsamëse ntšamo cachëngbe juabnénga yomncá, mo ibetiñe cuaftsajncá.

22 Chënga jtsichámuana corente osertánënga imomna ca, pero ndegombrna juabna ndbomnénga mondmëna.

23 Chënga ndoñe ntsadoránana Bëngbe Bëtsá, chë ndocna te yochjëftsobaná; chë cuenta, soyënga tmojobopormá mo entsangcá, y chëngna aíñe jóbanana; o soyënga shloftšëngcá o bayëngcá, o osjonyayëngcá, y chënga diosënga imomna ca jtsejuabnayëse jtsadoránana.

24 Chíyeca, Bëngbe Bëtsá cachcá tojónya, cachëngbe ainaniñe puerte bacna juabnéngaca mandánënga chamotsiyenama, y chca, bacna soyëngnaca ínÿengaftaca imojtsama; chë soyëngamna jtsëuatjana chënga entsamna.

25 Chënga chca jtsemnana, er ndoñe tmonjábošena Bëngbe Bëtsabe ndegombre soyënguiñe jtsošbuáchiyana, pero chë ndoñe ndegombre soyënguiñe cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentse tojama soyënga; pero ndoñe ntsadoránana, ni ntseservénana cach Bëngbe Bëtsá, chë nyetsca chë soyënga tojanmá. Entšanga nyets tempo cha chamotsatschuaná. Chca chaotsemna.

26 Entšanga chca ndoñe tšabá tmonjámayeca, Bëngbe Bëtsá cachcá tojónya, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama.

27 Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguiñe jasúfriase, ntšamo chëngbe bacna soyëngama yojtsëmerecencá.

28 Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiamama imotatsëmbcá ndegombre bëtsemnama. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá.

29 Chënga nÿetscna bacna soye jtsamana: ainaniñe nÿetscna bacna juabna jtsebomnana, nÿe cachëngbiamama bëtscá soyënga jtsebomnama tša jésebošana, y ínÿengbioye ntšámnaca jáborlama jtsebošana; chënga nÿe játsbošana inÿa tojtsebomna soyënga jtsebomnama, ínÿenga jtsëbánayana. Mondmëna penzentserënga, ínÿenga áingñayënga, puerte bacna soyënga ínÿengbiamama bošënga, y uayátsenayënga.

30 Chënga ínÿengbiamama podesca

jtsóyebuambnayana, Bëngbe Bëtsá jtsáyayana, ínÿenga jtsóyanguayana, nÿe cachëngbe soyënga más iuámana ca jésejuabnayana, tša jtsenábotamnayana, jésejuabnayana ntšamo muanjobenaye más bacna soyënga jamana; chëngbe bëtsëtsangbioye ndoñe ntsayaunanana.

<sup>31</sup> Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiamana ntjóngmiana.

<sup>32</sup> Y chënga corente mondétatšëmbo chca soyënga amëngbiamana, Bëngbe Bëtsá chabe leyinë tojayana jóbanama yojtsëmrecena ca; pero masque chca, chënga nÿets tempo chca jtsamana, y oyejuayënga jtsénÿayana ínÿenga cachcá tmojtsama ora.

## 2

*Bëngbe Bëtsá echanjama chë ndoñe tšabe soye amënga bëts castigo chamotsebomnama*

<sup>1</sup> Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiamana šmojtsichamo ora, jtsinÿanÿnayana cach tšëngaftángnaca ndoñe tšabá šmonjamama, y castigánënga jtsemnama cmontsamna, er tšëngaftanga cachëngcá šmojtsiyena.

<sup>2</sup> Bënga mondétatšëmbo, Bëngbe Bëtsá ntšamo ndegombre yomncá inétsamama, chë chca amëngbiamana ndoñe tšabá tmonjama ca y

castigánënga jtsemnama yojtsamna ca cha tojayana ora.

<sup>3</sup> Y tšëngaftanga, chë ínÿenga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentsana šmochjotsbocá ca?

<sup>4</sup> Bëngbe Bëtsá tšëngaftangbiana corente tšabe juabna endbomna; mora ndoñe quecmátacastigaye, y tšëngaftangftacna puerte uantado nÿe chca endétsemna. ¿Chama tšëngaftanga cha šmojtsábotena? ¿Ndoñe šmondétatšëmbo Bëngbe Bëtsá chca corente jtsababuánÿeshanëse cmojtsënÿa, tšëngaftanga juabna chašmotrocama y chabe benache chašmuishachama cha yobóseyeca?

<sup>5</sup> Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëts castigo chašmotsebomnama, chë ndayté Bëngbe Bëtsá ntšamo entšanga tmojamcá tšabá o ndoñe tšabá bétsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebomnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjínÿanÿiye cha tša tbojetna, entšanga ndoñe tšabá tmonjamama.

<sup>6</sup> Chca, chë te, ntšamo cada ona tojëftsemama, Bëngbe Bëtsábentsana echanjóyëngacñe.

<sup>7</sup> Ndëmuanyënga nÿets tempo tšabá jtsamëse imoyena, y chca imonguá Bëngbe Bëtsá más



uámanënga chauabiama, cha chëngbiana tšabá chaotsoyebuambná y tšabe vida jtsebomnama chaoma; chë te chëngbiana Bëngbe Bëtsá echanjama, chë nyetsca tescama yomna tšabe vida chamotsebomnama.

<sup>8</sup> Inyënga imoyena, nye cachëngbe juabnéngaca cachënga tšabá jtsomñama; y ntšamo ndegombre tšabá yomncá tmojtsaboté, ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjëftsobuachjanguamna puerte etonaná echanjayana nyetsca tescama castigánënga jtsemnana chënga yojtsamna ca.

<sup>9</sup> Bëngbe Bëtsá echanjama, chca amëngna puerte chamosufrima y lastemcá chëngbiana chaotsemnana, er yapa tsetšénana chëngbiana echanjëftsemna; chca echántsemna chë chcángbeñe judiënga imomnëngbiana natsana, y ndoñe judiëngbiámna.

<sup>10</sup> Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnana, chëngbiana corente tšabá echanjóyebuambaye, y echanjama chënga cháftaca tšabá tempcá chamotsatsmënama; y chca echántsemna chë chcángbeñe judiënga imomnëngbiana natsana, pero ndoñe judiëngbiámna.

<sup>11</sup> Er Bëngbe Bëtsabiama nyetscanga cachcá monduámana.

<sup>12</sup> Chë Moisesbe ley ndoñe monduábomnënga, bacna soye tmojamamna castigo mochántsebomna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga

imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebomna ca, chë leyënguiñe iuayana soyëngaca.

13 Chca endmëna, er Bëngbe Bëtsá ndoñe queonÿbatsma entšanga chabe bominÿiñe tšábenga chamotsemnama, nÿe ntšamo chë leyiñe iuayancá tmojtsuenanama, sinó ntšamo leyënguiñe iuayancá, ndayá jamama yojtsamncá tmojtsamëse.

14 Chë ndoñe judiënga chca leyënga ndoñe quematábomna, pero chëngbe ainanentša juabnënga tojtsëtsëtsná ndayánaca jamana, y ndayá chamotsamama ntšamo chë leyënguiñe tomandancá chënga tmojamëse, chënga jtsinÿanÿnayana tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama.

15 Ntšamo tmojtsiyencá chënga jtsinÿanÿnayana, ndayá leyiñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinÿanÿnayana chënga ntšamo chë leyiñe yomandánama cachcá imojuabnama. Inÿe ora, chëngbe juabnënga echantsëtsëtsnaye aíñe o ndoñe tšabá tmonjama ca; y ndayté, Bëngbe Bëtsá nÿetscangbiana ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínÿanÿiye ndayá tšabá o ndoñe tšabá tmonjamama.

16 Chë te, Bëngbe Bëtsá nÿetscangbiana

echanjayana chëngbe juabnëngama y ntšamo tmojamama, ndayá entsanga tempo ndoñe tmonjáninýama; cha chca echanjama Jesucrísoftaca; y chë atše sëndabuayiyná tšabe noticiënga entsichamo ndegombre chca yochtsemnama.

### *Judiënga y Moisesbe ley*

<sup>17</sup> Y mora tšëngaftangbiana, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jtsenábotamnayana Bëngbe Bëtsabe ubuáyana entsanga šmomna ca;

<sup>18</sup> tšëngaftanga chë ntšamo Bëngbe Bëtsá yobošcá tšëngaftanga chašmotsamama tatsëmbënga, y chë leyentsana šmojuatsjinýe jobocacayana ndayá más tšabá jamama tojtsemncá.

<sup>19</sup> Tšëngaftanga tša jésejuabnayana, šmobena ínýenga chë ntšamo tšëngaftanga cmësertancá ndosertánënga jujabuáchama ca, mo jtanënga unachayënga cuaftsemnëngcá, o mo chë ndoñe binýniñcá oyenëngbe juabnënga binýnayëngcá;

<sup>20</sup> tšëngaftanga jtsejuabnayana chë ntšamo tšabá yomncá ndosertánëngbiana abuayiynayënga šmomna ca, y mo chë basengcá tondaye nduatsjínýenëngbiana abuátambayënga ca. Tšëngaftanga tša jésejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca.

<sup>21</sup> Y chcasna, tšëngaftanga chë ínýenga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínýengbioye

jtsabuayiynayana ndoñe chamondëtsatbëbanama; as, ¿ndáyeca cach tsëngaftanga šmnëtsatbëbana?

<sup>22</sup> Tsëngaftanga jtsichámuana, acbe shema o boyábioye ndoñe ínÿaftaca cattseíngñaye ca; as, ¿ndáyeca tsëngaftanga cachcá šmnëtsama? Tsëngaftanga jtsáboyënjana soyënga chë ndayama ínÿënga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsana uámana soyënga šmnëtsatbëbana?

<sup>23</sup> Tsëngaftanga tša jtsenábotamnayana chë ley šmobomnama; as, ¿ndáyeca šmonÿbétsama ínÿënga Bëngbe Bëtsabiana podësca chamotsóyebuambnama, tsëngaftanga chë leyentša mandënga jobedésama ndocna te ntsebošana causa?

<sup>24</sup> Chama, Bëngbe Bëtsabe uabemana palabrënguiñe mëntsá endayana: “Tsëngaftanga judiëngbe causa, ndoñe judiëngbeñe Bëngbe Bëtsabiana ndoñe tsábá quematoyebuambná ca.”

<sup>25</sup> Tsëngaftanga ntšamo leyíñe yomandancá šmojtsamëse, Bëngbe Bëtsábënga šmomnama jinÿanÿiyama, chë más delicadentše base bobachtema tëtšëñënga jtsemnana tsábá nántsemna; pero ntšamo chiñe tomandancá ndoñe šmontsamëse, chca tëtšëñënga jtsemnana, tondayama ntoservénana, y chca, tsëngaftanga jtsemnana mo chë más delicadentše base bobachtema ndëtëtšëñëngcá.

<sup>26</sup> Y chë ndoñe judiënga chë más delicadentše base bobachtema tëtšëñënga, judiëngcá ndoñe quemátsmëna; pero chënga ntšamo leyíñe yomandancá tmojtsamëse, ndegombre Bëngbe Bëtsá chënga echanjúbuaja mo cachabe entšangcá.

27 Y chca, tšëngaftanga judiëngbiana Bëngbe Bëtsá echanjayana ndoñe tšabá šmonjama ca, ntšamo leyiñe yomandancá ndoñe šmonsama causa. Cha chca echanjama, er bëtscá ndoñe judiënga mondmëna y chënga ntšamo leyiñe yomandancá mondocumplina, pero chënga ndoñe quemátsmëna tšëngaftangcá tëtšenënga, jtsinýnama Bëngbe Bëtsábënga šmomnana. Tšëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tëtšenënga šmondmëna, cabá ndoñe šmonsama ntšamo leyiñe iuayancá, ndayá jamama cmojtsamnama.

28 Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canýe ndegombre judío. Y canýe entšá ndoñe Bëngbe Bëtsábia ntsemnana nýe inýënga chë más delicadentše base bobachtema tmojatëtšama.

29 Y canýe entšá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entšá yomnana tojtsinýanýnase. Y chca, canýe ndegombre judío, Bëngbe Bëtsabe entšá yomnana chaotsinýnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínýnama. Bëngbe Bëtsabe Espíritu jamana entšá chca ainana chaotsebomnana, ndayá inétsinýanýnaye cha canýe ndegombre judío yomnana; y chë uabemana ley ndoñe quenátobena chca jamana. Bëngbe Bëtsá endmëna chë tšabe soye entšabiama ichamuá; entšanga ndoñe.

### 3

<sup>1</sup> Chcase, ndánaca šuatjatjaye, as ¿Bëngbe Bëtsabe entsá jtsemnama jëftsashjáchama, más tšabá yojtsemna canýe judío jtsemnana ca? ¿Base bobachtema chë más delicadentše tëtšená jtsemnana becá yojtsámama ca?

<sup>2</sup> Aíñe, chca jtsemnana corente enduámama y nýetsca soyënguiñe; natsana chjayana, Bëngbe Bëtsá, judiënga chabe palabra tojanabanýe, nýetscangbiamama chamotsinýenama.

<sup>3</sup> Y morna, ¿ndayá yochjopása nderado judiënguentše báseftanga ya ndoñe chca tmontsentšénese? Y chë causa, ¿Bëngbe Bëtsánaca yochtsajbaná ntšamo tojašebuachenacá amana?

<sup>4</sup> ¡Ndoñe, ndegombre ndoñe! Chca ndoñe cha queochatsma; tšëngaftanga šmondëtatšëmbo Bëngbe Bëtsá sempre endbétsama ndayá jamama tojašebuachenacá, masque nýetsca entsanga bosterënga chamotsomñe. Er Bëngbe Bëtsabe uabemama palabrénguiñe Bëngbe Bëtsabiamama mëntšá endayana:

Aca ntšamo chacojayana ora, nýetscangama mochanjinýe aca ntšamo ndegombre yomncá cnétsamama;

y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tšabá montsamama ca.

<sup>5</sup> Pero bënga ndoñe tšabe soye montsama ca báseftanga tmojayana ora, Bëngbe Bëtsá siempre tšabá inétsamama entsanga más tšabá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tšabá tonjama ca, bëngbiamama castigo

chaotsemna ca cha tojayana ora? (Morna atše sëntsoyebuambná ntšamo entšanga jóyebuambayama monduamancá.)

<sup>6</sup> ¡Ndoñe, ndegombre ndoñe! Ndoñe quemuátobena chca jayanama. Bëngbe Bëtsá nyets tempo ntšamo ndegombre yomncá ndoñe tontsamëse, ndegombre cha ndoñe nanjobenaye jayanama nyetsca quem luarentša entšangbiama, ntšamo tmojamcá tšabá o ndoñe tšabá bëtsemnama.

<sup>7</sup> Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chë soye tojoservé Bëngbe Bëtsá puerta uamaná y bëtsá yomnama jinÿanÿiyama, y Bëngbe Bëtsá sempre ntšamo ndegombre yomncá tojtsamama jinÿama entšanga tmojtsobenëse, ¿ndáyeca Bëngbe Bëtsá cabá iuichamo ntšamo atše tijamcá ndoñe tšabá yontsemna ca y atše canÿe bacna soye amá stsemna ca?”

<sup>8</sup> Y chcase, ndánaca mëntšá nanjátayana: “Ntšamo ndoñe tšabá yondmëncá mochjama, chca, entšanga chámuinÿe Bëngbe Bëtsá puerta tšabia yomnama ca.” Ndegombre, atše mal jaquédama báseftanga tmojayana atše chca stsabuatambá ca; Bëngbe Bëtsá chca abuátambayënga echanjácastigaye, ntšamo castigánënga jtsemnama imomerecencá.

*Ntšamo entšá tojtsamama, Bëngbe Bëtsabe bom-  
inÿiñe ndocná tšabia ntsemnana*

<sup>9</sup> Y asna, ¿Bëngbe Bëtsá bënga judiënga ínÿengbiama más tšabá šonÿa? ¡Ndoñe, ndegombre ndoñe! Atše ya sënjinÿinÿé judiënga y ndoñe

judiëngnaca, chë bacna soyënga jamama juabnëngaca mandánënga imomnana.

10 Er Bëngbe Bëtsabe uabemana palabrenguiñe mëntšá endayana:

Ntšamo entšá tojtsamama, ndocná Bëngbe Bëtsabe bominyiñe tšabia quenátsmëna.

¡Ndoñe, ndegombre ndoñe, ni mo canya chca quenátsmëna!

11 Ndocná quenátsmëna ntšamo ndegombre yomncá chabotsosertánama;

¡Ndocná quenátsmëna nda chaotseboše Bëngbe Bëtsáftaca jtsemnana!

12 Njëtscanga ndoñe tšabe benache tmojishache y chiñe montsajna.

Chënga njëtscanga Bëngbe Bëtsabe bominyiñe ton-dayama quemátoserverna.

Ndocná quenátsmëna ntšamo tšabá yomncá chaotsamama, ¡ni canya ndoñe!

13 Ntšamo tmojtsichamcá puerte bëts bacna soye jtsemnana, mo canye obanabe cuevëshe atëfjnëshe puerte bacá tojtsonguëtšecá.

Chënga tmojtsoyebuambná soyëngaca ínÿengbioye jtsaíngñayana.

Chë tmojtsichamo soyëngaca puerte bacna soye ínÿengbiama jtsamana, mo canye mëtscuaye tbojtseftëtše orcá, chë veneno canye entšábioye jóbana.

14 Chënga, njëts tempo ínÿengbiama podësca jtsichámuana, y sempre jtsóyebuambnayana chë ínÿenga ntšámnaca jáborlama.

15 Sempre jtseprontánana ínÿengbioye ntšámnaca jáborlama y jobáyama.



16 Chënga sempre jtsiyenana ínÿenga chamotsesufrínama jtsamëse, y nÿe ntšámnaca jtsaborlánana.

17 Chënga ndocna te tondaye ntjamana nÿetscanga natjëmbana chamotsiyenama;

18 Chënga ndoñe ntsiyenana Bëngbe Bëtsabiana jtsejuabnayëse, cha chë más bëtsá nÿetscangbiana yomnama ca —chiñe endayana.

19 Er bënga mondétatsëmbo, lempe ntšamo leyiñe iuabemancá, chë leyëngaca mandánënga imoyenëngbiana yomnama. Chcasna, chë ley endmëna, Bëngbe Bëtsabe delante ndocná chaondobená jayanama, cha ndoñe tšabá tonjama, chama ndoñe yonjátatsëmbo causa ca; y endmëna jinÿanÿiyama, ntšamo tmojamcá tšabá o ndoñe tšabá bëtsemnama Bëngbe Bëtsá nÿetscangbiana yochjayana ora, nÿetscanga yojtsamna chabe delante jayanama, ndáyeca ntšamo tšabá yomncá ndoñe tmonjama ca.

20 Er, Bëngbe Bëtsá ndoñe queochatsma ndocná chabe bominiñe tšabia chaotsemna, ntšamo leyiñe yomandancá cha tojamama; chë ley bëngbiana jamana, nÿe bënga bacna soye tmojamama chamotsetatsëmbuama.

*Ntšamo Bëngbe Bëtsá inama entsanga chabe bominiñe tšábenga chamotsemnama*

21 Pero mora, Bëngbe Bëtsá tonjinÿanÿé ntšamo cha inama entsanga tšábenga chabe bominiñe chamotsemnama; y Bëngbe Bëtsá ndoñe ntjamana canÿa chabe bominiñe tšabia chaotsemnama, ntšamo ibomncá cha tojtsamama, ntšamo

chë leyënguiñe y mandënguiñe yomncá. Pero masque mora chca, Bëngbe Bëtsá tonjinÿanÿé, Moisesbe leyiñe y Bëngbe Bëtsabe juabna oyebuamb-nayëngbe librëšangañe yopodena jinÿenana chca yochtsemnama.

22 Bëngbe Bëtsá jamana entšanga chabe bominiñe tšábenga chamotsemnama, chënga Jesucristbeñe tmojtsošbuáchema. Bëngbe Bëtsá nyetscanga Crístbeñe ošbuáchiyëngbiama chca jamana, y chabiama nyetscanga cachcá monduámána;

23 er nyetscanga bacna soye tmojama, y chë causa, ndocna entšá tonjobená jashjáchana ndocna bacna soye ndbomná jtsemnama y puerta bëtsá jtsemnama, ntšamo Bëngbe Bëtsá tojanjuabocá entšanga chamotsemnama.

24 Pero Bëngbe Bëtsá chëngbiama corente tšabe juabna bómnyeca, mo ndayá cuafjatšatacá, cha jamana chënga chabe bominiñe tšábenga chamotsemnama. Bëngbe Bëtsá chca tojanma, Cristo Jesúsbeyeca, entšanga atsebácanënga chamotsemnama y ya ndoñe más bacna soyënga jamama juabnëngaca mandánënga chamondëtsemnama cha tojanma ora.

25 Bëngbe Bëtsá cha tbojanábuayana, chabe buiñe juabuáshanëse y jóbanëse, cha chaotsemna ndábeyeca Bëngbe Bëtsá entšanga bacna soyëngama jáperdonama; Jesucristbeñe jtsošbuáchiyëse entšanga jobenayana perdonánënga jtsemnama. Bëngbe Bëtsá chca tojanma, jinÿanÿiyama cha inétsama entšanga tšábenga chabe bominiñe chamotsemnama, chë entšanga bacna soyënga

tmojanmama chë tempo ntjatonjáyca, er cha chë tempo corente uantado chëngaftaca yojtsemna y chëngbe bacna soyëngama ndoñe yonjánacastigaye.

26 Cha lempe chca tojanma, jinjányiyama cha sempre ntšamo ndegombre yomncá inétsamama, y nyëtscanga Jesucristbeñe ošbuáchiyënga chabe bominyiñe tšábenga chamotsemnana inétsamama.

27 Chcáyeca, entšá ndoñe ntsobenana tondayama ntsenábotamnayana. Chca endmëna, er Bëngbe Bëtsá tšabia chabe bominyiñe jabemana, ndoñe ntšamo leyiñe tomandancá cha tojtsamama, sinó nyë Jesucristbeñe tojtsošbuáchema.

28 Y chca jayanëse, mora bënga tšabá montsetátšëmbo, Bëngbe Bëtsá inétsama canyë entšá tšabia chabe bominyiñe chaotsemnana, nyë Jesucristbeñe tojtsošbuáchema, y ndoñe ntšamo leyiñe yomandancá cha tojtsamama.

29 ¿O Bëngbe Bëtsá nyë judiëngbe Bëtsá yomna? ¿Ndoñe judiëngbe Bëtsánaca cha ndoñe yondmëna? Aíñe, chëngbe Bëtsánaca cha endmëna;

30 er nyë canyë Bëtsá nyëtscangbiana endmëna, y cha echanjama chë más delicadentse base bobachtema tëtšenënga imomnëngbiana y ndoñe chcangbiámnaca, chabe bominyiñe tšábenga chamotsemnana, Jesucristbeñe tmojtsošbuáchema.

31 Chcasna, Bëngbe Bëtsá jamana entšanga chabe bominyiñe tšábenga chamotsemnana, Jesucristbeñe tmojtsošbuáchema; ¿chca yojtsayana chë ley nyë tondayama yondoservena ca? ¡Ndoñe, ndegombre ndoñe! Inyëtšá, chca jamana chë ley

más chaotsámanama.

## 4

### *Ntšamo Abrahánoftaca tojanopasá*

<sup>1</sup> Morna Abrahambiana mochjóyebuambaye, bēngbe tempsca bēts taitá, y mochjinýe ndayá tojánatsjinýe Bēngbe Bētsábeñe ošbuáchiyana bomnentsana.

<sup>2</sup> Abraham chabe bominyiñe tšabia chaotsemnama, ndayá cha tojanmama Bēngbe Bētsá matēnjanmēse, cha matēnjanobená entšángbeñe ndayama jtsenábotamnayana, pero Bēngbe Bētsabe delante ndoñe;

<sup>3</sup> Er Bēngbe Bētsabe uabemana palabreñguiñe mēntšá endayana: “Abraham, Bēngbe Bētsábeñe yojtsošbuáchiye, y chíyeca Bēngbe Bētsá tonjánayana cha chabe bominyiñe tšabia yojamna ca.”

<sup>4</sup> Canýe entšá trabajayá, crocénana josháchiñana ndayá tojamama, pero chē crocénana ndoñe nýe tšetánana ntsemnana, sinó chana jtsemnana ntšamo cha tojtsomerecencá.

<sup>5</sup> Er menójuabonga, nda tondaye tontsama Bēngbe Bētsá cháuyanama cha chabe bominyiñe tšabia yomna ca, pero aíñe tojtsosbuaché Bēngbe Bētsábeñe, nda endbáyana chē bacna soye tmojamēnga mora mo ndoñe chca cuafjamcá chamotsemna ca, chabiana Bēngbe Bētsá echanjama chabe bominyiñe tšabia chaotsemnama, chabe ošbuáchiyama.

<sup>6</sup> Rey David cachcá chabe librēšañe tojánayana, chē ndabiana Bēngbe Bētsá jayanana chabe bominyiñe tšabia chaotsemna ca, masque chabiana chca cháuyanama tondaye tonjamēse. David chca

entšabiama tojánayana, cha puerte echantsoyejuaye ca.

<sup>7</sup> Chabe librěšaňe měntšá tojanábema:

¡Tša oyejuayěnga jtsemnana chě Běngbe Bětsá chěngbe bacna soyěnga tojáperdonanga, chě Běngbe Bětsá chěngbe bacna soyěnga tojabuajuánanga!

<sup>8</sup> ¡Puerte oyejuayá jtsemnana chě Běngbe Bětsá mo ndoňe bacna soye cuafjama cuenta tbojtsonyá cha ca!

<sup>9</sup> ¿David tojánayana nýe chě más delicadentše base bobachtema tětšeněnga imomněngbiama oyejuayana yomna ca? Ndoňe; ndoňe chca mondměněngbiámna. Y muentše tmonjayana, Abraham Běngbe Bětsábeňe yojtsošbuachéyeca, Běngbe Bětsá tojánayana cha chabe bominyiňe tšabia yojamna ca.

<sup>10</sup> Y ¿ntseco chca tojanopasá? ¿Abraham ya chě más delicadentše base bobachtema tětšená yojtsemna ora, o cabá ndoňe chca yontsemna ora? Ndegombre, Abraham cabá ndoňe chca tětšená yontsemna ora.

<sup>11</sup> Y cabá chentšana, Abraham base bobachtema chě más delicadentše tětšená yojtsemna; y chca yojamna jinýanýiyama, Běngbe Bětsá tempo ya chabiama tojánayana cha chabe bominyiňe tšabia yojamna ca, cha Běngbe Bětsábeňe yojtsošbuáchema. Lempe chca tojanopasá, jinýanýiyama Abraham mo taitacá yomnama Běngbe Bětsábeňe imošbuachéngbiama, masque ndoňe base bobachtema chě más delicadentše tětšeněnga mondměna. Y cachcá Běngbe Bětsá

chë ošbuáchiyëngbiana tojánayana, chënga chabe bominyiñe tšábenga imomna ca.

<sup>12</sup> Y Abrahámnaca endmëna mo chë taitacá, chë más delicadentše base bobachtema tëtšenënga imomnëngbiana, pero aiñe Bëngbe Bëtsábeñe corente jtsošbuáchiyëse imoyenëngbiana, cachcá ntšamo bëngbe bëts taitá Abraham Bëngbe Bëtsábeñe yojtsošbuachecá. Y cha cabá chë más delicadentše base bobachtema ntsetëtšena ora, ya chca yojtsošbuáchiye.

*Jtsošbuáchiyëse, ntšamo Bëngbe Bëtsá tojanašebuachenacá jóshjanguana*

<sup>13</sup> Bëngbe Bëtsá tojanašebuachená Abraham-biana y chábentšana entšangbiana, quem luare chëngbiana yochjëftsemna ca. Y chca tojanašebuachená, ndoñe Abraham ntšamo leyiñe yomandancá betsobedecénama, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominyiñe tšabia yojamna ca.

<sup>14</sup> Pero, ntšamo Bëngbe Bëtsá tojanašebuachenacá, bënga ntšamo chë leyiñe yomandancá tmojtsamëngbiana yojtsemna ca tmojayanëse, Bëngbe Bëtsábeñe jtsošbuáchiyana tondayama nantsoservena, y ntšamo Bëngbe Bëtsá tojanašebuachenacá tondaye ntsámanana.

<sup>15</sup> Chë ley juabocnana, Bëngbe Bëtsá puerte etonaná entšanga cháuacastigama, chënga ntšamo chiñe iuayancá ndoñe tmontsamama; pero ndocna mandënga tontsemnëse, ndocná ntsoobenana chë ndoñe tontsayancá ndoñe ntjamana.

16 Y chca, Bëngbe Bëtsá Abrahámbioye tbojanšbuachená, cha yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnama chë Bëngbe Bëtsábeñe imošbuáchema mo Abrahámbentšana entšangcá imomnëngbiama; y Bëngbe Bëtsá chca tojanašebuachená, cha chëngbe tšabiama iuan-tjéšnayeca. Chë mo Abrahámbentšana entšangcá imomnëngbeñe, ndoñe quemnatsmëna nÿe chë ntšamo ley yomandacá imnétsamënga, sinó nÿetscanga chë ntšamo Abraham tojanošbuachecá Bëngbe Bëtsábeñe imošbuachéngnaca. Y Abraham nÿetscanga bëngbiama, Bëngbe Bëtsábeñe ošbuáchiyënga, mo taitacá endmëna.

17 Ntšamo Bëngbe Bëtsabe uabemana palabrënguiñe endayancá, Bëngbe Bëtsá Abrahámbioye ibojtsatsëtsnaye ora: “Atše sënjama aca ba luariñe entšangbiama atšbe bominiñe taitá chacotsemnama ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entšanga chámuatayenama, y nda inamánda y entšanga jobenayana jinÿama ndayá ndocna te tmonjaninÿcá.

18 Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnama, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entšangbe taitá”, ntšamo Bëngbe Bëtsá tbojaniancá: “Acbentšana entšanga tša mallajta mochántsemna, ndocná queochatobe-

naye jacúntana ca”.

19 Abraham yojanobatmanëntsçuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonyaye ya bëtsanánějema yojtsemnama, er ya mo patse uata yojtsebomna, y chabe shema, Sara, ndoñe yonjobena šešonga jtsabamnama.

20 Abraham ndocna te tonjanajbaná Bëngbe Bëtsábeñe ošbuáchiyana, y ni mo canye ndoñe yonjanjuaboye chë ntšamo Bëngbe Bëtsá tbojanšbuachenacá ndoñe joparějana ca; sinó más corente chábeñe yojtsanošbuaché, y chca Bëngbe Bëtsábioye ibojtsatschuanaye,

21 er cha tšabá inatátšëmbo, ntšamo tbojanšbuachenacá jamama, ndegombre Bëngbe Bëtsá obená inamnama.

22 Chiyeca, Bëngbe Bëtsá tojánayana cha chabe bominyiñe tšabia yojamna ca.

23 Pero, chabe bominyiñe tšabia yojamna ca Bëngbe Bëtsá tojánayana ora, ndoñe nye Abraham-biama chca ntsóyebuambnayana;

24 ndayá bëngbiámnaca, ndëmuanyëngbiamama Bëngbe Bëtsá yochjayana chabe bominyiñe tšábenga imomna ca, bënga Bëngbe Bëtsábeñe imošbuachéyeca; Bëngbe Bëtsá, nda tojanma Bëngbe Utabná Jesús cháuatayenama.

25 Bëngbe Bëtsá tojanalesenciá entšanga Jesús chamóbama, bënga bacna soyënga tmojanma causa, y Bëngbe Bëtsá tojanma cha cháuatayenama. Bëngbe Bëtsá chca tojanma jobenayama, bënga chabe bominyiñe tšábenga jábiamama.



## 5

*Mora bënga Bëngbe Bëtsabe bominyiñe tsábenga montsemna*

<sup>1</sup> Er Bëngbe Bëtsá tojama bënga chabe bominyiñe tsábenga chamotsemnama, bënga chábeñe imošbuachéyeca; mora tempcá tsabá Bëngbe Bëtsáftaca bënga montsatsmäna, Bëngbe Utabná Jesucrístbeyeca.

<sup>2</sup> Bënga Crístbeñe mondošbuáchema, cha tojama bënga chamotsetatsëmbuama Bëngbe Bëtsá tša tsabia yomnama, y Bëngbe Bëtsábiocana tsabe soyënga jtsebomñese mora chamotsiyenama. Bënga tša oyejuayënga jésemnana, er Bëngbe Bëtsábeñe jtsošbuáchiyëse mondobátmana cha puerte uámanënga y bëtsétsanga šochjábiamama, batśá ntšamo cachá yomncá.

<sup>3</sup> Y ndoñe nye chama bënga oyejuayënga jésemnana, ndayá bënga tmojtseufrina y padecena soyënguiñe tmojtsajna órnaca. Chca mondbama, er bënga mondëtatšëmbo bënga tmojtseufrina orna, bënga juatsjínÿana ntšamo uantadënga jtsemnama padecena soyënguiñe tmojtsemna ora, Bëngbe Bëtsábeñe jtsošbuáchiyëse.

<sup>4</sup> Bënga padecena soyënguiñe tmojtsemna ora, más tsabá uantadënga jtsemnama mondobéyeca, Bëngbe Bëtsá oyejuayá bëngaftaca jtsemnana, padecena soyënguentšana ndegombre tsabá tmojachnëngo ora. Bëngbe Bëtsá oyejuayá bëngaftaca chaotsemnama bënga tmojama ora, bënga jtsobenana más jtsobátmanana, ntšamo šojašebuachenacá cha yochjamama.

5 Bënga chca tmojtsobátmanëse, ndocna te nÿe bonamente quemochatobátmana, er Bëngbe Bëtsá šojinÿanÿé tša bëtscá cha šuababuánÿeshanama. Bëngbe Bëtsá chca tojama chë Uámana Espíritbeyeca, y cha endmëna nda Bëngbe Bëtsá tbojanichmó bëngbe ainaniñe chaotsemnama jtsemándayama.

6 Tempo bënga tondaye chemuatanobená jamana Bëngbe Bëtsabe bominÿiñe tšábenga jtsemnama, y chora Cristo tojanóbana bënga chë bacna soyënga tmojamëngbe tšabiama, nÿa chama tempo yojamna ora.

7 Ndoñe paselo quenátsmëna jajuaboyana, ndáyeca canÿa nantseprontana jóbanama canÿa ntšamo chë leyiñe yomandancá jamama tojtsamanabiama; pero, canÿa bëtscá jtsababuánÿeshanëse tšabe soyënga ínÿengbiamama tojtsamabiama, nderádose chabiama jóbanama cuantseprontana.

8 Pero Bëngbe Bëtsá bënga šojanÿanÿé tša šuababuánÿeshanama, er bënga cabá bacna soyënga ntsamcá imojoyena ora, Cristo bëngbiamama tojanóbana.

9 Cristo, chabe buiñe juabuáshanëse bëngbiamama tojanóbanayeca, Bëngbe Bëtsá tojanma bënga chabe bominÿiñe tšábenga jtsemnama. Y chca endmënayeca, ndegombre Cristo šochanjátsebacaye, entšanga ndoñe tšabá tmonjama ca y castigo chëngbiamama chaotsemna ca Bëngbe Bëtsá chaojayana ora.

10 Bënga tempo Bëngbe Bëtsá imojanáya; pero cha tojanma bënga cháftaca tempcá tšabá chamot-satsmënama, chabe Uaquiñá tojanóbanayeca. Y

mora, bēnga natjēmbana cháftaca chamotsemnama ya tojama ora, ndegombre atsebácanēnga mochántsemna, chabe Uaquiñá ainá yómnayeca.

11 Y ndoñe nje chca, ndayá bēnga cháftaca puerte oyejuayēnga chamotsemnámna Bēngbe Bētsá jamana, ndayá Bēngbe Utabná Jesucristo bēngbiama tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamot-satsmēnama.

### *Adán y Cristo*

12 Canye entśá bacna soye tojanma causa, nyetsca entśanga bacna soyēnga amēnga tmojábocana; y cha tojanóbana, bacna soyēnga tojanma causa. Y chca, nyetsca entśanga entsamna jóbanama, er nyetscanga bacna soyēnga tmojama.

13 Bēngbe Bētsá Moisésbioye chē leyēnga cabá nduántšaboshjona ora, entśanga quem luarentše bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjatonjyayana entśanga bacna soyēnga tmojamama.

14 Nyetsca entśanga, Adánbentšana Moisésbentscoñe, nyetscanga yojánamna jóbanama, ntšamo cach Adán tojanmcá ndoñe tmonjanmēgnaca, ntšamo cha ndoñe chaondēmama Bēngbe Bētsá tbojanmandacá cha tojanma ora. Y Adánbeñe entśanga mondobena jinjyama, ntšamo chē jabama ibojamná canye soyēnguiñe yochtsanmēna.

15 Pero ntšamo chē útata tbojanmcá ndoñe cachca soye quenátsmēna; er Bēngbe Bētsá entśangbe tšabiamama jtsejuabnayēse tšabe soyēnga

chëngbiamá tojanma ora, ndoñe yonjamna mo ntšamo Bëngbe Bëtsá tbojanmandacá ndoñe chaondëmama Adán tojanma orcá. Tšëngaftanga šmondëtatsëmbo, nÿe canÿe entšá canÿe bacna soye tojanma causa, cha tojanma nÿetsca entšanga jóbanama chaotsamnama, pero Bëngbe Bëtsá entšangbe tšabiamá yójuabnáyeca, más bëts soyënga jamana, chë Adanbe bacna soye entšangbiamá bacna soyënga tojanmama. Chca, Bëngbe Bëtsá tojanma ba entšanga bëtscá tšabe soyënga chamotsebomnama; y chca tojama, nÿe canÿe entšá, Jesucristo, tšabe soyënga tojánmayeca.

<sup>16</sup> Chë ba entšanga bëtscá tšabe soyënga chamotsebomnama Bëngbe Bëtsá tojamentšana endóbocana soye, puerte inÿetšá comna, chë entšá Adán, canÿe bacna soye tojanmentšana tojanóbocna soyama. Adán bacna soye tojanmentšana, Bëngbe Bëtsá tojánayana chana bacna soye tojanma y castigo jtsebomnama ibojtsemna ca, y nÿetsca entšágnaca chë causa; pero masque nÿetscanga bacna soyënga tmojama, Bëngbe Bëtsá entšangbe tšabiamá ndoñe bëndëtsebnatjémbayeyeca, tojanma entšanga chabe bominiÿiñe tšábenga chamotsemnama y chë bacna soyëngama castigánënga ndoñe chamondëtsemnama.

<sup>17</sup> Ndegombre endmëna, canÿe entšá bacna soye tojanma causa, nÿetsca entšanga jóbanama yojtsamna. Pero puerte más, canÿe entšá Jesucristo tojanma. Ndëmuanÿëngbiamá Bëngbe Bëtsá tojama bëtscá tšabe soyënga chamotsebomnama, ndëmuanÿëngbiamá Bëngbe Bëtsá tojama chabe bominiÿiñe tšábenga

chamotsemnama, y Bëngbe Bëtsábiocana chca tmojóyëngacñënga, chënga nÿetscanga mochantsiyena bacna soyënga jtseyënjanayëse y nÿetsca tescama mo bëtsëtsangcá; y chca echántsemna ndayá Cristo tojánmayeca.

18 Y chca, ntšamo canÿe entšá, Adán, canÿe bacna soye tojanmama, Bëngbe Bëtsá tojánayana nÿetscanga bacna soye tmojanma y castigánënga chamotsemna ca; cachcá ntšamo canÿe entšá, Cristo, puerte tšabe soye tojánmayeca, Bëngbe Bëtsá jayanana nÿetscanga imojtsobena chabe bominyiñe tšábenga jtsemnama y chë nÿetsca tescama yomna tšabe vida jtsebomnama ca.

19 Y ntšamo Bëngbe Bëtsá tbojanmandacá ndoñe chaondëmama canÿe entšá tojanma causa, nÿetsca entšanga bacna soye amënga tmojanobiama; cachcá, ntšamo Bëngbe Bëtsá tbojanmandacá canÿe entšá, Jesucristo, tojánmayeca, Bëngbe Bëtsá tojanma bëtscá entšanga chabe bominyiñe tšábenga chamotsemnama.

20 Chë ley entšangbe cucuatšiñe tmojanáboshjona, jinÿanÿiyama ntšamo ndegombre yomna bacna soyënga jtsamana; pero entšanga más bacna soyënga imojtsama ora, Bëngbe Bëtsá cabá más chëngbe tšabiama yojtsanjuabnaye y más tšabe soyënga chëngbiama yojtsama.

21 Chcasna, mora mochjayana, entšanga bacna soyëngaca puerte mandánënga imojamna, y chca, nÿetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entšanga chabe bominyiñe tšábenga chamotsemnama, Bëngbe Utabná

Jesucrístbeyeca chë nyetsca tescama yomna tšabe vida chamotsebomnama; chíyeca mora bēnga montsobena jtsiyenama, Bēngbe Bētsá šojatšatá tšabe soyēnga lempe bēngaftaca jtsemnēse.

## 6

### *Crístbeyeca bēnga tšabe vida jtsebomnana*

<sup>1</sup> Y asna, ¿ntšamo mochjayana? ¿šojtsamna jtsiyenana sempre bacna soyēnga jtsamēse, chca, Bēngbe Bētsá šuababuánjeshanama más chašotsinyanñnama, cha más bacna soyēnga bēnga jtsaperdónayēse?

<sup>2</sup> ¡Ndoñe, ndegombre ndoñe! Tempo bēnga monjaniyena bacna soyēnga jamama juabnēngaca mandánēnga, pero mora bēnga montsobena jtsiyenana chë juabnēnga tondaye bēngbioye ntsamcá, y chca, bēnga montsobena mo obanēngcá chë soyēngama jtsemnana; y as, ¿ndáyeca bēnga mutjátsjuabnaye ntšamo ndoñe tšabá tontsemncá jatiyenana?

<sup>3</sup> Er ndegombre tšēngaftanga šmondétatšēmbo, bēnga uabáinēnga tmojanoquedá ora, tmonjaninñanyé bēnga Cristo Jesúseftaca cánñiñe mo canñacá bétsemnana; y bēnga uabáinēnga tmonjanoquedá ora, enjamna mo bēnga cuafjobancá, ntšamo Cristo tojanobancá.

<sup>4</sup> Bēnga uabáinēnga tmonjanoquedá ora, enjamna mo bēngnaca cháftaca cuafjobancá, y cháftaca uatabuantsanēngcá. Chca yojamna, bēnga chamotsobenama mo tsēm entšangcá jtsiyenama, ntšamo Crísoftaca tojanopasacá, cha

cháuatayenama Běngbe Bětsá tojanma ora, chabe puerte běts obenánaca.

<sup>5</sup> Běnga Crísoftaca cányiñe mo canyácá jtsemněse, cha tojanóbana ora mo běngnaca cháftaca cuafjobancá enjámnayeca, ndegombre běnga cányiñe mo canyácá cháftaca mochántsemna, běnga cachiñe vida nyetsca tescama chamotsats-bomnama Běngbe Bětsá jtsaměse, ntšamo Cristo cháuatayenama cha tojanmcá.

<sup>6</sup> Y běnga mondětatsěmbo, chě ntšamo běngbe vida enjamncá, bacna juabněngaca mandáněnga, Jesucrístbeñe cabá ntsošbuáchiye ora, mora ya ndoñe chca yontsemnama; y chca entsemna mo chě tempsca vida chaóbanama cuafjamcá, Cristo tmojanrucificá ora. Chca yojamna, Běngbe Bětsá jobenayama chě bacna soyěnga jamama běngbe juabněnga jtsepochócama; y chca, ya ndoñe más chě bacna soyěngaca mandáněnga chamondětsemnama, mo nyets tempo nyě ínŷabiama oserveněngcá.

<sup>7</sup> Er canye entšá tojóbana ora, chě bacna soyěnga chábioye ya ndoñe más ntsemándayana.

<sup>8</sup> Er Cristo tojanóbana ora, mo běngnaca cháftaca cuafjobancá endmėnayeca, cháftaca jtsiyenámna běnga montsošbuaché.

<sup>9</sup> Běnga mondětatsěmbo Cristo cháuatayenama y ndocna te cha cachiñe jatóbanama Běngbe Bětsá tojanmama; y ndocna obenana queochatsma cha cachiñe chauatóbanama.

<sup>10</sup> Cha tojanóbana, y chě bacna soye jamama juabněnga ndocna te ntjobenayana chábioye jamándana, y ínŷenga ndoñe imontsobena ntšamo cha jabórlana; y ntšamo mora cha yoyencá, Běngbe

Bëtsá jtse servénama yomna.

11 Cachcá, tšëngaftanga cmontsamna jtsejuabnayana, chë ya ndoñe más bacna soyëngaca mandánënga šmojtsemnana, pero vida šmobomna lempe jtsamëse Bëngbe Bëtsá tšëngaftangaftaca oyejuayá chaotsemnana, Cristo Jesúseftaca cányiñe mo canyáca jtsemnëse.

12 Tšëngaftanga cmontsamna, chë bacna soyënga jamama ainantëse šmobomna juabnëngaca ndoñe más mandánënga ntsemnana, chca, tšëngaftanga ndoñe chašmondëtsamama juabnëngaca nye cach tšëngaftanga, tšëngaftangbe cuerpiñe tšabá jtsomñama.

13 Tšëngaftanga ndoñe quecmátamna jalesénciana ndaye tšëngaftangbe cuerpentša soye, bacna soyënga jamama chaoservema. Chamna, tšëngaftanga cmontsamna Bëngbe Bëtsá jauyanana, lempe ntšamo tšëngaftanga šmomncá, cha jaserviama chaotsemna ca, tšëngaftanga chë šmomna mo ya ndoñe más obanëngcá Bëngbe Bëtsabiama, y tojanma tšabe vida chašmotse bomnana; y jauyanana nyetsca tšëngaftangbe cuerpentša soyëngna Bëngbe Bëtsá jaserviama yojtsemna ca.

14 Ndoñe quecmátamna bacna soyëngaca mandánënga jtsemnana, er tšëngaftanga ndoñe quešmátiyena leyíñe iuayana soyëngaca mandánënga, y šmondoyena Bëngbe Bëtsá tšëngaftangbiama tšabá jtsejuabnayëse.

*Ošbuachiyá obligaciónaca jtsemnana ntšamo tšabá yomncá jamama*



15 Y asna, ¿bēnga imojtsobena bacna soyēnga jamana, chē leyiñe iuayana soyēngaca ndēmandánēnga imomnama, y Bēngbe Bētsá bēngbiama tšabá jtsejuabnayēse bēnga imoyenama? ¡Ndoñe, ndegombre ndoñe!

16 Tšēngaftanga tšabá šmondētatsēmo, ínŷabe cucuatšīñe mo nŷets tempo nŷe ínŷabiama oservenēngcá šmojoquedá ora, cha jtsobedecénama, ndegombre tšēngaftanga chē nduiñbiama nŷets tempo oservénēnga jtsemnana. Chcasna, cachcá jtsemnana, chē tšēngaftanga šmojabocacá bacna soyēngaca mandánēnga jtsemnana, y chca jtsemnana mo Bēngbe Bētsabe bominyiñe tšēngaftanga nŷetsca tescama obanēnga cuaftsemncá, o Bēngbe Bētsá jtsobedecénama, y chca, chabe bominyiñe tšábenga jabocanana.

17 Pero šontsamna Bēngbe Bētsá jtsatschuanayana, er tempo tšēngaftanga mo nŷe ínŷabiama oservenēngcá šmojamna, bacna soyēnga jamama juabnēngaca mandánēnga; pero mora nŷets ainánaca šmojoyeuná, ntšamo chē tcmojanabuatambá soyēnguiñe šmojoyēngacñēcá.

18 Bēngbe Bētsá tšēngaftanga cmojatsebacá, bacna soyēngaca ndēmandánēnga chašmotsemnana, y morna mo Bēngbe Bētsabiama oservenēngcá šmojabocna, ntšamo tšabá yomncá jtsamama.

19 Muentše sēnjoyebuambá ntšamo entsanga mondbetsichamcá, er tšēngaftanga ndoñe corente juabna quešmátsbomna toto palabrenga chacmósertama. Tempo, tšēngaftanga šmonjanamana jaleséciana, lempe ntšamo šmojamncá mandánēnga jtsemnana, bacna

soyënga shembásaftaca o boyabásaftaca jamama juabnéngaca, y nýe ndaye bacna soyënga jamama juabnéngaca. Cachcá, mora tsëngaftanga cmontsamna jalesénciana tsëngaftanga chašmotsemnama juabnéngaca mandánënga tsabe soyënga jtsamama, chca, ndegombre Bëngbe Bëtsabe entšanga chašmotsemnama.

<sup>20</sup> Tsëngaftanga, cabá bacna soyënga jamama juabnéngaca mandánënga šmonjamna ora, tsëngaftanga ndoñe obligaciónaca quešmënjatsmëna ntšamo Bëngbe Bëtsabiama tsabá yomncá játamama.

<sup>21</sup> ¿Ndaye tsabe soye tsëngaftanga šmojosháchiñe chë tempo šmojánama soyënga amiñe? Tondaye; y mora chë soyëngama šmojtsëuatja. Chca soyënga tcojamentšana jóbocnana, entšá nyetsca tescama castiganá chaotsemnama, mo Bëngbe Bëtsabe bominyiñe nyetsca tescama obaná cuaftsemncá.

<sup>22</sup> Pero mora, ndoñe quešmátsmëna bacna soyënga jamama juabnéngaca mandánënga, y mora bëtscá šmojtsentšena Bëngbe Bëtsá jtseyeunanana y jtsešervénana. Chca jtsamana, tsëngaftangbiana puerte tsabá entsemna, er chca, Bëngbe Bëtsabe entšanga šmochántsemna, y cabana, chë nyetsca tescama yomna tsabe vida šmochántsebonna.

<sup>23</sup> Bacna soyënga tcojtsamentšana jóbocnana entšá nyetsca tescama castiganá chaotsemnama, mo Bëngbe Bëtsabe bominyiñe nyetsca tescama obanënga cuaftsemncá; pero, Bëngbe Bëtsá šojtsatšatná soyënguentsana, jóbocnana chë nyetsca tescama yomna tsabe vida jtsebonnana, Cristo Jesús Bëngbe Utabnáftaca cányiñe mo canýacá

jtsemnëse.

## 7

*Chë bouamnátbentsana ndayá bēngbiama mochju-atsjinjē*

<sup>1</sup> Jesucrístbeyeca catšátanga, tšēngaftanga šmotátšēmbo ntšamo chë leyēnga entsangbiama inétsemnama; tšēngaftanga šmotátšēmbo, ntšamo chë leyiñe tojtsayancá canjē entsá chaotsamamna, nje chë entsá tojtsainēntscuana chábioye jtsemándayana.

<sup>2</sup> Chcasna, canjē bouamna shembása, ntšamo chë leyiñe endayancá bontsemna chabe boyáftaca jēftsemnana, chë boyá tuainēntscuana; pero chë boyá tojtsóbanēsna, chë leyiñe endayana, chë shemna canjā jtoquédana, chë boyabiama ndēmandaná ca.

<sup>3</sup> Y chca, chë shema injē boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínŷaftaca ingñayá ca. Pero chabe boyá tojtsóbanēse, chë leyiñe endayana chë shemna canjā jtoquédana, chë boyabiama ndēmandaná ca, y cha jtsobenana ínŷaftaca jtobouamayana; y chca tojama ora, boyábioye ínŷaftaca ingñayana ndoñe ntsemnana.

<sup>4</sup> Tšēngaftanga chë ošbuachiyēngaftácnaca cachcá endmēna; ya ndoñe más chë léyeca mandánēnga quešmátmēna, er Cristo tojanóbana ora šmojánbocna, mo chë soyēngama obanēnga cuafjoquedangcá, ínŷabe entsanga jtsemnama, Crístbenga, ndabiama Bēngbe Bētsá tojanma cháuatayenama; y chca jtsemnëse, bēnga bētscá

soyënga ntšamo tšabá yomncá chamotsamama, Bëngbe Bëtsá jasérviamá.

<sup>5</sup> Bënga chë nÿe ntšamo cabënga innabošcá monjaniyena ora, chë ley enjanoserverna bëngbe ainaniñe chamotsebomnama bacna soyënga jamama puerte bëts juabnënga, nÿe bënga tšabá jtsomñama. Ba bacna soyënga tmonjanma, y chë causa bënga šonjánamna nÿetsca tescama castigánënga jtsemnama, mo Bëngbe Bëtsabe bominiñe nÿetsca tescama obanënga cuaftsemncá.

<sup>6</sup> Pero mora Bëngbe Bëtsá šojatsebacá chë léyeca ndëmandánënga chamotsemnama; chë ley tempo enjamna bëngbiamá mo canÿe amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y aiñe tsmëcá chamotsiyenama, ntšamo chë Uámana Espiritu iuamcá bënga vida chamotsebomnama.

*Bacna soye jamama juabna tcojtsebomñese, chë ley jamana entšá bacna soye chaomama*

<sup>7</sup> Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndëtatšëmbo ndayá yomna bacna soye jamana. Atše ndocna te matijántatšëmbona ndayá yomna chë “ínÿabioye jtsántšabošana”, “ínÿabioye ndoñe cattšantšabošeca” chë leyiniñe ndoñe matmëñjanábemëse.

<sup>8</sup> Pero bacna soyënga jamama juabnënga atše bomna causa tonjanma, atše puerte chaitsebošama chë ndoñe šonjamna jtsebošana soyënga; y chca chë juabnëngaca tonjanopasá,

atše chë leyënguiñe ndayá iuayanama jtsejuabnayëse. Er ndocna ley tondmëna ora, entsá ndoñe ntsetatsëmbuana ndayá yomna bacna soye jtsamana.

<sup>9</sup> Canye tempo enjamna, chora atše sënjaniiyena leyëngama ntsetatsëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontsé chë bacna soyënga jamama juabnëngaca mandaná jtsemnama;

<sup>10</sup> y chora atše sënjántatsëmbona, chë causa šojtsanmëna nÿetsca tescama castiganá jtsemnama, mo Bëngbe Bëtsabe bominyiñe nÿetsca tescama obaná cuaftsemncá. Bëngbe Bëtsá chë mando tojanma, atše chë nÿetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nÿetsca tescama castiganá jtsemnama.

<sup>11</sup> Chë leyentsa mandiiñe inye soyënga ndoñe šonjëtsemna jamama ca yojsayánayeca, chë bacna soyënga jamama juabnënga átšbeñe, šmonjaniñé bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama, mo Bëngbe Bëtsabe bominyiñe nÿetsca tescama obaná cuaftsemncá.

<sup>12</sup> Pero bënga mëntsá mochjayana: chë leyna tšabe soye endmëna, er Bëngbe Bëtsábiocana tojanóbocna, y chë mandëngnaca Bëngbe Bëtsábiocana tojanóbocna ca; chiñe endayana ndayá tšabá yomna jamana y chca tšabá

jtsemnana.

<sup>13</sup> Y asna, ¿quem tšabe soye tojanma atše chašotsemna nŷetsca tescama castiganá jtsemnama, mo Běngbe Bětsabe bominŷiñe nŷetsca tescama obaná cuaftsemncá? ¡Ndoñe, ndegombre ndoñe! Chě bacna soyěnga jamama juabněnga atše bomna causa, chca átšeftaca tonjanopasá. Chě tšabá yomna sóyeca, chě bacna soyěnga jamama juabněnga tmonjanma atše chašotsemna nŷetsca tescama castiganá jtsemnama. Chca chě juabněngaca tonjanopasá, entšanga jobenayama jtsetatsěmbuama ndayá yomna bacna soye jamana; y chě mando, bacna soye jamama ndoñe yondměna ca jtsichámuana causa, nŷetsca entšanga mondobena jinŷana canŷe bacna soye, mo canŷe puerte běts bacna soycá.

<sup>14</sup> Běnga mondětatsěmbo chě ley Běngbe Bětsabe ley yomnama, pero atšna nŷe canŷe entšá sěndměna, canŷa nŷets tempo nŷe bacna soyěnga jamama juabněngaca mandaná.

<sup>15</sup> Ndegombre ndoñe quešnátěsertana ntšamo sěntsamcá, er ndoñe ntsamana ndayá jamama stsebošcá, pero aíñe jtsamana ndayá jamama ndoñe šontsogustancá.

<sup>16</sup> Pero chě atšbe ainaniñe stsejuabná ndoñe tšabá tontsemna soye stsaměse, ndayama leyiñe iuayana ndoñe candměna ntsamana ca, chca atše jtsinŷanŷnayana chě ley ndegombre tšabe soye yomnama.

<sup>17</sup> Chcasna, atše ya ndoñe ntsemnana chě chca tojtsamá, ndayá chě bacna soye jamama atšbe ainaniñe yomna juabněnga jtsamana atše chca jamama.

18 Atše sëndētatsēmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama.

19 Atše ndoñe quetsátama chë tšabe soye ndayá jamama sëndbošcá, pero aíñe sëntsama chë bacna soye ndayá jamama ndoñe sëndbošcá.

20 Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama atšbe ainaniñe yomna juabnënga chca yojtsama.

21 Chca, atše tijátatsēmbona ndayá átseftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama.

22 Atšbe ainanoca puerte sëntsoyejuá, Bëngbe Bëtsábíocana yóbocana mandëngama.

23 Pero atše sënjinÿena inÿe soye átseftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca yomna mo ndegombre soyca, mo chë bacna soyëngaca mandaná cuaftsemncá.

24 ¡Tša lastema atšbiamá! Chë bacna soye jamama juabnënga átšbeñe entsemánda, y entsama atše chašotsemna nÿetsca tescama castiganá jtsemnama, mo Bëngbe Bëtsabe bominiñe nÿetsca tescama obaná cuaftsemncá. ¿Nda nanjobenaye chentšana atše jatsbocama?

25 Nÿe Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochtsatschuanaye. Atšbe ainanoca atše aíñe sëntsejuabná chë ley puerte

tšabe soye yomna ca, y jobedésama sěntseboše; pero chě bacna soye jamama átšbeñe yomna juabněngaca, atše bacna soyěnga sěntsama, ntšamo chě juabněnga šontsemandacá.

## 8

### *Ntšamo Běngbe Bětsabe Espíritu yomandacá jt-siyenana*

<sup>1</sup> Y chca, Běngbe Bětsá ndoñe ntjayanana, Cristo Jesúseftaca cánýiñe mo canýacá imomněnga, chěngbe bacna soyěngama nýetsca tescama castigáněnga jtsemnana vojtsamna ca.

<sup>2</sup> Er, chě Uámana Espíritoftaca mandáněnga mondměnayeca, Běngbe Bětsá šojatsebacá, běnga chě bacna soye jamama juabněngaca mandáněnga ndětsemnana, y nýetsca tescama castigáněnga ndětsemnana, mo Běngbe Bětsabe bominyiñe nýetsca tescama obaněnga cuaftsemncá. Chě Uámana Espíritu jamana běnga ndegombre tšabe vida chamotsebomnana, cánýiñe mo canýacá Cristo Jesúseftaca jtsemněse.

<sup>3</sup> Běngbe Bětsá tojanma ndayá Moisesbe ley ndoñe tonjanobenacá, er entšanga mondoyena nýe ntšamo cachěnga imobošcá, y nýe cánýenga ndoñe ntšobenana jamana ntšamo tojtsamncá. Běngbe Bětsá tojánayana entšángbeñe bacna juabněngbe mando jtsepochócama ca, y chama chabe Uaquiñá tbojanichmó. Cha quem luaroye mo canýe entšacá tojánabo, canýe ainánaca, mo chě entšanga bacna soye aměngbe ainancá, pero ndocna te ni mo canýe bacna soye ndoñe



tonjéftsema; y tojánabo, chábeyeca entšanga bacna soyëngama perdonánënga chamotsemnana.

<sup>4</sup> Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniñe yomandacá y ndoñe nýe ntšamo bënga entšanga tmojtsebošcá, chamobenama tšabá jamana ntšamo chë leyiñe yomandancá, ntšamo šojtsamncá.

<sup>5</sup> Chë nýe cachënga tšabá jtsomñama cachëngbe juabnëngaca imoyenënga, nýe sempre jésejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espíritu ainaniñe iuamëndacá oyenëngna, sempre jésejuabnayana tšabe soyënga jamama, ntšamo chë Uámana Espíritu yobošcá.

<sup>6</sup> Ntšamo chë nýe cachá tšabá jtsomñama juabnëngaca mandaná oyenentsana jóbochnana entšá nýetsca tescama castiganá chaotsemnana, mo Bëngbe Bëtsabe bominýiñe nýetsca tescama obaná cuaftsemncá; y ntšamo chë Uámana Espíritu tojtsemandacá oyenentsana jóbochnana chë nýetsca tescama yomna tšabe vida jtsebochnana y ainaniñe tšabe ebionana.

<sup>7</sup> Chë nýets tempo oyenënga nýe ntšamo tmojtsebošcá nýe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoñe ntsamana ntšamo cha tojtsamëndacá, y chca jamama ndoñe ntsobenana;

<sup>8</sup> y chca, chë nýe chca bacna juabnëngaca oyenënga, ndoñe ntsobenana jamana ntšamo Bëngbe Bëtsá tšabá tbojtsinýancá.

<sup>9</sup> Pero tšëngaftanga ndoñe quešmátiyena nýe cach tšëngaftanga tšabá jtsomñama cach

tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniñe cmamëndacá, er chë Uámana Espíritu sempre tšëngaftangbe ainaniñe iuétsemna. Nda ndoñe quem Cristbe Espíritu tondbomná, ndoñe Cristbia ntsemnana.

<sup>10</sup> Pero Cristo sempre tšëngaftangbe ainanentše vida totsóbomñese, masque tšëngaftangbe cuerpënga yochjopochóca, quem luarentše entsanga bacna soyënga jtsamana causa, tšëngaftangbe espíritu nyets tempo vida echanjesóbomñe, er Bëngbe Bëtsá tojama tšëngaftanga chabe bominyiñe tšábenga chašmotsemnana.

<sup>11</sup> Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniñe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbana cuerpo, cachiñe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniñe iuétsemna.

<sup>12</sup> Chcasna, Jesucristbeyeca catšátanga, šontsamna jtsiyenana ntšamo chë Uámana Espíritu ainaniñe šuamëndacá; ndoñe quešnátamna jtsiyenana nye bënga tšabá jtsomñama cabëngbe bacna juabnëngaca;

<sup>13</sup> er nye bënga tšabá jtsomñama cabëngbe bacna juabnëngaca šmojtsiyenëse, castigánënga šmochántsemna, mo Bëngbe Bëtsabe bominyiñe obanënga cuaftsemncá; pero Uámana Espíritbeyeca, chca juabnëngaca nyetsca bacna soyënga jtsamana jtsajbanama šmojobenase, chë nyetsca tescama

yomna tšabe vida šmochántsebonna.

<sup>14</sup> Ntšamo chë Uámana Espíritu yomandacá tmojtsamëngna, Bëngbe Bëtsabe básenga jtsemnana.

<sup>15</sup> Er Bëngbe Bëtsá ndoñe tonjama bënga ainaniñe canye espíritu chamotsebonnama, mo nýe ínÿabiama nýets tempo oservenëngcá chašotsamëndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebonnama Espíritu jamana bënga Bëngbe Bëtsabe básenga chamotsemnama, y chë Espíritu endama “Atšbe Taitá ca” bënga Bëngbe Bëtsá chamotsechembuanama.

<sup>16</sup> Y chë Uámana Espíritu y bëngbe espíritu canye ora jayanana bënga Bëngbe Bëtsabe básenga imomna ca.

<sup>17</sup> Y Bëngbe Bëtsabe básenga mondménayeca, bëngnaca mochanjóyëngacñe ndayá cha chabe básenga jatsatayama tojašebuachenacá; bënga y Cristo cánÿiñe chë soyënga mochanjóyëngacñe, er bënga inýe soyënguiñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsëtsanga chásuabiamama, ntšamo cach Cristo yomncá.

*Bëngbe Bëtsá bëtsëtsanga y uámanënga šochjábiamama*

<sup>18</sup> Atše ndegombre sëndétatšëmbo, ntšamo quem tempo bënga imosufrincá, puerte batsatema yomna chë bëngbe tšabiamama uámanana y buashinÿinÿanana Bëngbe Bëtsá šochjínÿanÿiyama.

<sup>19</sup> Lempe ntšamo Bëngbe Bëtsá tojamcá endmëna mo tša cuafstobatmancá, chaobuache chë

Bëngbe Bëtsá ntšamo chabe básenga imomnama jinŷanŷiyama ora.

20 Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsemnama cha tojanjuabocá. Chca tojanopasá, ndoñe chë lempe ntšamo cha tojanmcá chca chaotsemnama tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá josérviana ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canŷe te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátšama ora chama cha tojanjuabnacá;

21 Bëngbe Bëtsá canŷe te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsemnama, lempe ntšamo cha yojanjuabnacá, chabe uámanana y buashinŷinŷanana jtsebomnama, cachcá yochjama lempe chë cha tojanma soyëngaca.

22 Er bënga mondëtatšëmbo lempe ntšamo Bëngbe Bëtsá tojanmcá mëntscoñama yomna mo canŷe shembása šešona jtsebomnama ora tbojtsetsetšama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá.

23 Pero ndoñe nŷe chë lempe ntšamo Bëngbe Bëtsá tojanmcá yojtsemna mo chë shembasacá,

sinó bēngnaca; y bēnga ainaniñe mondbomna chē Uámana Espíritu, y chē soye endmēna ndayá natsana bēnga tmojanóyēngacñe, chē Bēngbe Bētsá bētsá soyēnga šochjátšatayentšana; bēnga bēngbe ainanoca tša jesobēsnyana, bēnga chabe básenga chamotsemnama Bēngbe Bētsá chaomama mondobátmanēntscuana, y chca, Bēngbe Bētsá chaoma bēnga ndocna te ndopochócama cuerpēnga chamotsebomnama.

<sup>24</sup> Bēnga, Bēngbe Bētsábeñe jtsošbuáchiyēse monjobátmana ntšamo cha tojanayancá chaomama, y chíyeca cha bēnga šojatsebacá; pero ndayama tmobatmancá, ya tojtsēchnējuanama bēnga tmojtsonyase, chora chama ya ndoñe ntjátobatmanēngana. Er ndocná jatobátmanana chē ndayá jinýama ya tojobenacá.

<sup>25</sup> Pero ndayama bēnga tmobatmancá, cabá ndoñe jinýama tmontsobena soye tojtsemnēse, bēnga jtsamnana Bēngbe Bētsábeñe jtsobátmanana, uantadēnga jtsemnēse, ntšamo tojayancá Bēngbe Bētsá chaomēntscuana.

<sup>26</sup> Uámana Espíritnaca bēnga šochandbētsējabuachana, er bēnga ainaniñe ndoñe corente ntsošbuáchiyana. Bēnga ndoñe quemuátstatšēmbo Bēngbe Bētsáftaca jencuéntana ntšamo ndegombre tšabá yomncá; pero cach Espíritu Bēngbe Bētsábioye bēngbiama jtsojtjanañana, mo chca ora chabe ainanoca tša cuaftsobēsna; y ndayá chca ora tbojtsotjanañamna, bēnga ndoñe ntjobenayana bēngbe palábraca chama jóyebuambayama.

<sup>27</sup> Y Bēngbe Bētsana, ntšamo entšanga ainanoca tmojtsebošcá yonýá, y ntšamo chē Espíritu

jayanama tojtsebošcá yotátšëmbo, er chë Espíritu chabe entšangbiamá ibotjanañe, ntšamo Bëngbe Bëtsá yobošcá.

*Bënga ayëñjanayëngama más tmojábcana*

<sup>28</sup> Y bënga mondëtatšëmbo, Bëngbe Bëtsá nyëtsca soyënguiñe inétsama cha imobobonshánëngbe tšabiamá, ndëmuanyënga cha tojáchembo chabe entšanga chamotsemnana, ntšamo cha jamama yojanjuabnacá.

<sup>29</sup> Jesucristbeñe imošbuachéngbiamna, Bëngbe Bëtsá quem luare tojanma orscana yojanjuabná y chënga tojanabacacá chca chamotsemnana, y chë tempšana tojaninyñaná chënga chabe Uaquiñacá chamotsemnana; chca, chabe Uaquiñá chë bëtscá catšátangeñe chë natsaná chaotsemnana.

<sup>30</sup> Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiamá tojanma chabe bominyiñe tšábenga chamotsemnana, y chëngbiámnaca yochjama chabe uámanana y obenanentšana chamotsebomnana.

<sup>31</sup> Y asna, ¿chë soyëngama ntšamo mochjayana? Co Bëngbe Bëtsá bëngaftaca tojtsemnëse, bënga jáyëñjanama ndocná queochatobenaye ca.

<sup>32</sup> Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nyëtsca bëngbe tšabiamá. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye.

<sup>33</sup> ¿Nda nanjobenaye jayanama chë Bëngbe Bëtsá tojábacacanga bacna soyënga tmojama y

castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominiñe tšábenga imomna ca.

<sup>34</sup> Y asna, ¿nda nanjobenaye jayanama bënga castigánënga jtsemnama šojtsamna ca? ¿Cristo Jesús cha yojtsemna? Ndoñe. Cristo, nda bëngbiama tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsabe catsbioica yojtsetbemana, jamándama y puerta bëtsá chentše jtsemnama; y choca, chánaca bëngbiama Bëngbe Bëtsábioye ibotjanañe.

<sup>35</sup> ¿Ndayá nanjobenaye Crístbentsana, chë tša šondababuanñeshanábentsana bënga jtsajuánayana? ¿Padecena soyënguiñe jtsemnana, tša jtsetsetšana, bënga chamosufrima ínÿenga tmojtsama ora, tondaye saná shëntsana ora, tondaye entšayá tmontsábomna ora, o resjo bëngbiama tojtsemna ora, o bënga jtsëbáyama ínÿenga tmojtseboše ora?

<sup>36</sup> Ntšamo Bëngbe Bëtsabe uabemana palabrënguiñe endayancá, canñe entšá Bëngbe Bëtsábioye ibojauyana ora:

Acbe causa entšanga cada te šontsëtsëtsná bënga jtsëbáyama ca;

entšanga bëngbioye nÿe ntšámnaca jtsaborlánana; bëngaftaca jamana mo chë jobáyama oveshëngaftaca mondbetsamcá ca.

<sup>37</sup> Pero ndoñe; nÿetsca chë soyënguentšana bëngna ayënjanayëngama más tmonjábocana, cha bënga šuababuánñeshanayeca.

38 Er atše tšabá sëndétatšëmbo tondaye yondobena, bēnga Bēngbe Bētsábentšana, chē tša šondababuanÿeshanábentšana jtsajuánayana: masque ainēnga o obanēnga tmojtsemna; ni angelēnga, ni amēndayēnga chca jamama quemátobena; ni chē mora yojtsēchnējuana soyēnga, ni chē más chcoye yochjopása soyēnga; ni ndocna obenana cach ndoñe;

39 ndocna quem luarentša tsbanánoca soye, ni quem luarentša tajsoica soye; ni ndocna inÿe soye ntšamo Bēngbe Bētsá tojamcá, quenátobena chca bēnga jtsajuánayama. ¡Ndocna soye quenátobena bēnga Bēngbe Bētsábentšana, chē bēnga šondababuanÿeshanábentšana jtsajuánayana, chē Cristo Jesús Bēngbe Utabnáftaca Bēngbe Bētsá šojanÿanÿé bonshánentšana!

## 9

*Bēngbe Bētsá Israeloca entšanga tojabacacá, uámanēnga chamotsemnama*

1 Atše, Crísoftaca cánÿiñe mo canÿacá quetsomñecana, ntšamo sēntsichamcá ndegombre endmēna; atše ndoñe quetsátsbostero. Atšbe ainanoca juabnēnga, Uámana Espíritbeyeca jtsemandánēse, chē šmonybēuyana tšabá o ndoñe tšabá tijamama, šmontsatsētsná atše ndoñe stsebosterama.

2 Ndegombre, atše puerte ngménaca atšbe entšangbiama, chē Israeloquēngbiama sēntsemna y atšbe ainana tša šontsetsetše, chēnga Jesucristbeñe jtsošbuáchiyama ndoñe quemátsboše causa.



<sup>3</sup> Tšabá tojtsemnëse, atše stjobenaye jtsebošana cach atše Bëngbe Bëtsábeyeca nÿetsca tescama castiganá y Crístbentshana luaroca jtsemnama, atšbe entsanga, chë cach atšcá buiñe bomna entsanga jujabuáchama.

<sup>4</sup> Chënga mondmëna chë Israeloca entsanga, chë Bëngbe Bëtsabe bocacana entsanga. Bëngbe Bëtsá chënga chabe basengcá tojánabiamá y chë tša bëtsá y uamaná cha yomnama chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiamá yojánboše y ndayá chëngbiamá jamama, y chë ley chëngbe cucuatšifne tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana.

<sup>5</sup> Chënga mondmëna chë bëngbe tempsca uámana bëts taitangbentsánënga, y Crístnaca mo canÿe entsacá, mo canÿe Israeloca entsangbentsacá tojánabo; y cha endmëna Bëngbe Bëtsá, nÿetsca soyënguiñe mandayá. Nÿetsca entsanga nÿets tempo cha chamotsatschuaná. Chca chaotsemna.

<sup>6</sup> Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nÿetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna.

<sup>7</sup> Ni nÿetsca Abrahámbentshana entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojanianana: “Chë ácbentshana entsanga nÿe Isaácbentshana mochanjabo ca.”

8 Chca entsayana, bēngna ndoñe šontsamna jtsejuabnayana Abrahám bentsana nyetsca entšangbiama mo Bēngbe Bētsabe basengcá; inyetsá, nye chē Bēngbe Bētsá tbojanšbuachenáyeca Abraham yojánabamna básengbiama cocayé entsemna jtsejuabnayana, Abrahám bentsana ndegombre entšanga bétsemnama.

9 Er mēntšá endmēna ntšamo Bēngbe Bētsá tojánayana, Abrahám bioye tbojanšbuachená ora: “Camēntša tempo entsba uata chanjésabo, y Sara canye šešona bochantse bomna ca.”

10 Pero nye nyetsá ndoñe quenátsmēna. Chē Rebecbe uta básatna canye taitá ibnabomna, bēngbe tempsca bēts taitá Isaac.

11-12 Bēngbe Bētsá, Rebécbioye tbojanayana: “Acbe mayor uaquiñá, acbe ngomēnche uaquiñábioye bochanjasérvia ca.” Cha chca tojánayana jinýinýiyama chē básatbentsana canya cha tbojánbocacama, Jacob, y ndoñe chē inye basa, Esaú, chca jamama tempo cha tojanjuabóyeca. Rebécbioye chca tbojanayana chē básata cabá ndonýna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chē básatbentsana canya y ndoñe chē inya chca chaotsemnama Bēngbe Bētsá tbojanábuayanayeca, y ndoñe ndayá chata tbojanmama.

13 Ntšamo Bēngbe Bētsá chabe uabemana palabrenguiñe tojanayancá: “Jacob sēnjánbobonshana, y Esaú sēnjanáboyēnja ca.”

14 Y asna, ¿ntšamo mochjayana? ¿Bēngbe Bētsá ndoñe cachcá nyetscángaftaca endétsemna ca?

¡Ndoñe, ndegombre ndoñe!

<sup>15</sup> Er Bëngbe Bëtsá Moisésbioye tbojaniana:  
Atse šochanjóngmia nda chaitsebošabiamana,  
y nda chaitsebošá chanjalastéma ca.

<sup>16</sup> Y chca, Bëngbe Bëtsá canye entšá jabocacayana,  
ndoñe ndayá chë entšá tojtsebošama o tojamama,  
ndayá Bëngbe Bëtsá tbojalastemama.

<sup>17</sup> Er Bëngbe Bëtsabe uabemana palabrenguiñe,  
Faraón chë Egiptoca réybioye cha tbojaniana:  
“Atse rey tcbonjábema, tša bëtscá atšbe obenana  
yomnama nyetscanga ábeñe chayinñanñema,  
y nyets luarentša entšanga atšbiamana  
chamotatsšëmbonama ca.”

<sup>18</sup> Y chca, Bëngbe Bëtsá jalastémama nda tojtsebošábioye,  
y nda tojtsebošábioye jalesénciana chabiamana  
nduauenaná chaotsomñama.

<sup>19</sup> Pero ndánaca tšëngaftanguentšá šuatjatjaye:  
“Bëngbe Bëtsá chca tojtsamëse, ¿ntšamo cha  
nantsobena jayanana canye entšá bacna soye  
tojama ca? ¿Nda nanjobenaye chë ndayá Bëngbe  
Bëtsá tojtsebošama corente contra jtsemnana?”

<sup>20</sup> Pero, nye entšá quecotsemñecá,  
¿ntšamo catjobenaye tša uamaná comna ca  
jtsejuabnayana, Bëngbe Bëtsá jatstjanayama  
ndáyeca canye soye chca yojtsama ca? ¿Chë  
pormana soye chë chca tojamábioye buanjauyana:  
“¿ndáyeca chca šcojama ca?”?

<sup>21</sup> Chë fshantse soyënga pormayá jtsobenana  
canye fshantsentšana jamana, canye  
matbaja uámana tescama, y inñajna cada te  
chaotsoservénama. Cachcá, Bëngbe Bëtsá  
jtsobenana jamana ntšamo cha tojtsebošcá,  
ndayá cha tojama sóyeca.

22 Běngbe Bětsá yojáboše jinŷanŷiyama entšángaftaca tbojánetnama, chěngbe bacna soyěngama; y yojáboše cha puerte obená yomnama jinŷanŷiyama. Chíyeca, chěnga tša yojaněuantana, chěnga chě nděmuanŷengbiamama Běngbe Bětsá yochjánayana chěngbe bacna soyěngama castigáněnga jtsemnama yojánamna ca, chě nděmuanŷengama jtsapochócama Běngbe Bětsá yojtsanprontana.

23 Y chánaca yojáboše jinŷanŷiyama cha puerte uamaná y bětsá yomnama. Cha tojama, běnga chě nděmuanŷengama cha šojanalastemá, chabe obenanentšana y uámananentšana chamotsebomnama; y cha tempo chca tojanjuabó běnga uámaněnga y bětsětsanga jábiamama.

24 Běnga mondměna chě nděmuanŷengama Běngbe Bětsá chama šojánachembo, ínŷengna judío entšanguentšana, y ínŷengna ndoñe judiěngbentšana.

25 Ntšamo chabe uabemana palabrěnguiñe, Oséasbe librěšañe Běngbe Bětsá tojanayancá:

Entšanga ndoñe átšbenga mondměněnga, chěnga “atšbe entšanga ca” chantsěbobuatma;

y canŷe luarentša entšanga ndoñe sěnjánababuanŷeshaněnga, chěngna “atšbe bonsháněnga ca” chantsěbobuatma.

26 Y cach luare ndayentše Běngbe Bětsá tojánayana: “Tšěngaftanga atšbe entšanga ndoñe quešmátsměna ca”,

cachentše Běngbe Bětsá ainá chěnga echanjáuyana “atšbe básenga ca”.

27 Israeloca entsangbiana, Isaías jabuachana tojánayana:

Masque Israeloca entsanga puerte banga chamotsemna, n̄ya mo ch̄e mar béjayoca ch̄en̄yañe cascajá,

Bēngbe Bētsá n̄ye báseftanga chentsana echanjátsebacaye;

28 er, ndoñe b̄en y Bēngbe Utabná can̄ye y n̄yetsca tescama echanjayana,

n̄yets quem luarentša entsangbiana ndayá ch̄enga tmojamama tšabá o ndoñe tšabá b̄etsemnama,

y ch̄engaftaca echanjama ntšamo chaojayancá ca —cha tojánayana.

29 Ntšamo Isaías tojanayancá, Bēngbe Bētsá Israeloca entsangaftaca ntšamo jamama tojanoyebuambá ora:

Bēngbe Utabná, n̄yets obenana bomná, ín̄yenga b̄enga jtsapochócama cha tojanalesenciá ora,

báseftanga b̄engbe entsanguents̄enga ain̄enga chamotsomñama ndoñe mat̄enjanm̄ese,

b̄enga mora pochocán̄enga mamojtsemna, mo ch̄e Sodomá y Gomorra puebl̄engoca entsangcá ca,

cha n̄yetscanga y n̄yetsca tescama tojt-sanapochócaye ca.

*Israeloca entsanga y ch̄e tšabe noticīenga*

30 Chcasna, mora m̄entsá mochjayana: ndoñe judīenga tondaye monjánama Bēngbe Bētsabe bom-in̄yiñe tšábenga jtsemnama, pero cha tojanma ch̄enga chabe bomin̄yiñe tšábenga chamotsemnama, ch̄enga chábeñe imojtsošbuáchiyama.

<sup>31</sup> Pero, Israeloca entšanga imojánboše Běngbe Bětsabe bominyiñe tšábenga jtsemnama, ntšamo chě leyiñe iuayancá jtsaměse; pero ndoñe chca tmonjanobená.

<sup>32</sup> ¿Y ndáyeca chca? Co chě Běngbe Bětsabe bominyiñe tšábenga jtsemnama, chábeñe jtsošbuáchiyěse, chěnga tondaye monjánama causa chca, sinó chca jtsemnama imojánboše nýe ntšamo leyiñe iuayancá jtsaměse. Y chca, chěngna Jesús tmojtsanaboté, ntšamo chě Běngbe Bětsabe uabemana palabrěnguiñe chě tmojtsanábotengbiana endayancá, chěngbiana cha yomna mo chě ndětsbé ndayiñe chěnga jtsojestjiamcá ca.

<sup>33</sup> Běngbe Bětsabe uabemana palabrěnguiñe cha chca tojánayana:

Smochjinýe, atše sěnjama Jerusalenentše canýa chaotsemna, y cha endměna mo ndětsbecá ndayentše chěnga mochjojestje,  
y canýe peñěscá ndayěse yochjama chěnga chamotsótsatsama;  
pero nda chábeñe tojtsošbuaché, ndocna te nýe bonamente queochátobatmana ca.

## 10

<sup>1</sup> Jesucristbeyeca catšátanga, atše nýets ainánaca sěntseboše y Běngbe Bětsá sěntseimpadana, cha Israeloca entšanga cháuatsebacama.

<sup>2</sup> Atše sěndětatsěmbo y sěntsobena chěngbiana jayanama, chěnga puerte mondboše Běngbe Bětsá jaserviama, pero ntšamo chěnga yojtsěsertancá, ntšamo Běngbe Bětsá jaserviama yojtsamnamna, ndoñe quenátsměna ntšamo ndegombre yomncá.

3 Chënga ndoñe tonjanësertá ntšamo Bëngbe Bëtsá inétsama entsanga chabe bominyiñe tšábenga chamotsemnama, y cachënga tmojánguango ntšamo jamëse jobenayama Bëngbe Bëtsabe bominyiñe tšábenga jtsemnama; pero ndoñe chca tmonjanobená, chë entsanga chabe bominyiñe tšábenga chamotsemnama ntšamo Bëngbe Bëtsá inetsamcá ainánaca ntjoyëngacñécá.

4 Er Cristo tojama entsanga ndoñe chamondëtsama ntšamo leyiñe iuayancá, Bëngbe Bëtsabe bominyiñe tšábenga jtsemnama, chca, chënga chamobenama chabe bominyiñe tšábenga jtsemnama, Crístbeñe jtsošbuáchiyëse.

5 Chë Bëngbe Bëtsabe bominyiñe tšábenga jtsemnama bošëngbiamana, ntšamo leyiñe iuayancá jtsamëse, Moisés mëntšá tojánayana, chëngbiamana tojanábema ora: “Nda tojtsama nyëtsca mandënga ntšamo leyënguiñe endayancá, tšabe vida echántsebomna, nyëts tempo chë leyëngaca mandaná ca.”

6 Mëntšá endmëna ntšamo Bëngbe Bëtsabe uabemana palabrenguiñe iuayana, entsanga chabe bominyiñe tšábenga chamotsemnama ntšamo cha inétsamama, Jesucristbeñe jtsošbuáchiyëse: “Ndoñe cattsetjanaye: ‘¿Nda celoye yochjátsjua ca?’ (chca endmëna ndayá Cristo quem luaroye chaotsmama);

7 o, ‘¿Chë obanënga imomna luaroye yochjátsma ca?’ (chca endmëna ndayá Cristo chë obanënga imomna luarentšana chaotsjuama).”

8 Ntšamo Bëngbe Bëtsabe uabemana palabrenguiñe iuayancá mëntšá endmëna: “Tšëngaftanga paselo šmontsobena ntšamo Bëngbe

Bětsá tojabuayenacá jouenama, tšëngaftanga ya chama palabrëngaca šmojoyebuambá y tšëngaftangbe ainaniñe chama šmojtsejuabná.” Chë buayenánana endmëna ndayá bënga ftsabuayiynacá, y chiñe endayana Jesucristbeñe jtsošbuáchiyama šojtsamna ca.

<sup>9</sup> Chë buayenana soyënguiñe endayana, Jesús ndegombre Bëngbe Utabná yomna ca aca tcojayanëse, y Jesucristo cháuatayenama Bëngbe Bětsá tojanmama, nÿets ainánaca tcojtsošbuáchese, Bëngbe Bětsá cmochjatsbocá ca.

<sup>10</sup> Er ainanoca bënga Jesucristbeñe jtsošbuáchiyana y Bëngbe Bětsá jamana cachabe bominiñe tšábënga chamotsemnama; palabrëngaca bënga jinÿanÿiyana ndegombre Jesucristbeñe imojtsošbuáchema, y Bëngbe Bětsá bënga játsebacana.

<sup>11</sup> Er Bëngbe Bětsabe uabemana palabrënguiñe mëntšá endayana: “Nda Bëngbe Bětsabeñe tojtsošbuaché, ndocna te nÿe bonamente queochátobatmana ca.”

<sup>12</sup> Judiënga y ndoñe judiënga atsebácanënga mondmëna cach sóyeca, er canÿe Utabná nÿetscangbe Utabná endmëna, y cha tmojt-sotšëmbuanëngbiana, cha bětscá jtsamana.

<sup>13</sup> Er Bëngbe Bětsabe uabemana palabrënguiñe mëntšá endayana: “Ndánaca Bëngbe Utabná tbojt-sotšëmbuanábioye, cha bochanjatsbocá ca.”

<sup>14</sup> Pero, ¿ntšamo cha mochjótšëmbona, chábeñe ndoñe tmontsošbuáchese? ¿Y ntšamo chábeñe mochtsošbuáchiye, chabiana jóyebuambayama ndoñe tmonjouenëse? ¿Y ntšamo chabiana



mochjouena, chabe buayenana soyenga chënga jáuyanama ndocná tontsemnëse?

15 ¿Y ntšamo chabe buayenánana mochtsabuátambaye, chëngbioye jíchamuama ndocná tontsemnëse? Ntšamo Bëngbe Bëtsabe uabemana palabrënguiñe endayancá: “¡Tša tšabá chë buayenánana abuatambayënga tmojáshjajna ora ca!”

16 Pero nyetscanga chë tšabe noticiënga ndoñe ntjoyeunayana. Cach Isaías mëntsá tojánayana: “Utabná, ¿nda chë mondabuayiyná soyënguiñe yojtsošbuaché ca?”

17 Chcasna, chë tšabe noticiënga jounëse, entšanga jobenayana Jesucristbeñe jtsošbuáchiyana; y nda Cristbiana tojtsabuayiynase, entšanga chabe buayenánana jounana.

18 Pero atše šcotjá: ¿ndegombre nandmëna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguiñe endayancá, chë Bëngbe Bëtsabe buayenana soyëngama oyebuambnayëngbiama:

Chëngbe oyebuambnayana nyets quem luariñe tojóshjango,  
y chëngbe palabrënga nyets luarënguentša entšangbenache tojuáshana ca.

19 Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés mëntsá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mochtsanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmotsíyentsbuašama, chënga chë ndoñe monjamna mo tšëngaftangcá atšbe entsanga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanésertá ca.

<sup>20</sup> Isaíasnaca, Bëngbe Bëtsabiamna tojanoyebuambá ora, puerte añémoca tojánayana:

Chë atše ndoñe šmondënguanga, šmonjínýena; y chë atšbiamna ndoñe mondënotíangbioye sënjenonýinýé ca.

<sup>21</sup> Pero Israeloca entsangbiamna mëntšá tojánayana: Nýets tempo atše tša sënjánama, chënga átšeftaca tšabá tempcá chamotsatsmënama, pero chënga ndoñe chemátanbošena jouenama, y atšbe contra monjëtsemna ca.

## 11

*Bëngbe Bëtsá, Israeloca entsangbiamna tšabe juabna yobomnama tojinýanýé*

<sup>1</sup> Y as mora šcotjá: ¿Bëngbe Bëtsá chabe entsanga tojtsanëbaté? ¡Ndoñe, ndegombre ndoñe! Cach atše canýe Israelocá sëndmëna, Abrahámbentsana entsá y Benjaminbe bëts pamillentsana entsá.

<sup>2</sup> Bëngbe Bëtsá chabe entsanga ndoñe tonjubaté, chë tempscana tojánabacacanga. Tšëngaftanga šmondëtatsëmbo ntšamo Bëngbe Bëtsabe uabemana palabrenguñe endayancá, Bëngbe Bëtsabe juabna oyebuambnaya Elías, Israeloca entsangbe contra Bëngbe Bëtsábioye cha ibojanatsëtsná ora:

3 “Bëngbe Utabná, acbe juabna oyebuamb-nayënga tmojtsebaye y acbiamana pormana altarënga tmojtsepochohá; nÿe atse vídaca tijoquedá, y chënga montseboše átšnaca jóbama ca.”

4 Y mëntsá Bëngbe Bëtsá tbojanjuá: “Atse canÿsëfta uaranga boyabásenga atšbiamana sënjacuedá, Baal ndoñe tmonjadoranga, ndayá entšanga tmojobopormá y imojtsejuabná canÿe dios yomna ca.”

5 Mórna cachcá entsemna, judiënguentsë báseftanga monduájamna Jesucristbeñe ošbuáchiyënga, ndëmuanÿenga Bëngbe Bëtsá tojabacacá, cha chëngbiamana tšabe juabna bómnyeca.

6 Bëngbe Bëtsá entšanga jabacacayana chëngbiamana tšabe juabna bómnyeca; y ndoñe chca ntjamana ndayá entšanga tmojamama. Er ndayá tmojamama Bëngbe Bëtsá entšanga tojabacacase, cha nanjínÿanÿiye cha chca inétsama, ndoñe nÿe chëngbiamana tšabe juabna bómnyeca.

7 ¿Y asna? Israeloca entšanga ndoñe chemátaninÿena ntšamo Bëngbe Bëtsabe bominÿiñe tšábenga jtsemnana, pero chënguentsënga básefta bocacánëngna aíñe tmojanobená. Bëngbe Bëtsá tojanalesenciá chë ínÿenga Israeloquënguentsana chabe buayenana soyënga ainaniñe ndoñe chamondóyëngacñama;

8 ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinÿana

ni josértana, mo nduabínÿnënga o nduauenanënga  
cuaftsemnëngcá ca.”

<sup>9</sup> Davídnaca chëngbiama mëntsá tojánayana:

Mo chë entsanga canÿe fiestentše oboyejuayënga,  
chëngbe uayayëngbeyeca nÿe ndeolpe  
ishëchenëngcá,

y mo chë bayëngbiama uachmaniñe ishëchenëngcá,  
chënga mal chamopasama chaomama  
Bëngbe Bëtsá sëntseimpadana, mo nda  
ndëtsbeñe cuaftsojestjca.

Chca Bëngbe Bëtsá chaoma, chëngbe bacna  
soyëngama;

y cha cháuyana chënga puerte castigánënga jtsem-  
nana yojtsamna ca, bacna soyënga tmojama  
causa;

<sup>10</sup> Bëngbe Bëtsá chaoma ntšamo mochjapásama  
chënga ndoñe chamondobená jtse-  
tatsëmbuana,

y chaoma puerte chamosufrima, nÿets tempo  
padecena soyënguiñe jtsiyenëse ca —cha  
tojánayana.

### *Bëngbe Bëtsá ndoñe judiënga tojatsebacá*

<sup>11</sup> As mora šcotjá: ¿Israeloca entsanga Bëngbe  
Bëtsá ndoñe tmonjanoyeuná ora, cha tojánayana  
chënga nÿetsca tescama castigánënga jtsemnana  
yojtsamna ca, ndocna inÿe soye chëngbiama  
ntsemncá? ¿Chëngbiama yojamna mo chë  
ndëtsbeñe jojéstjiana y jtëtsbanama ndoñe más  
ntjobenayancá? ¡Ndoñe, ndegombre ndoñe!  
Chca ndoñe quenátsmëna. Chënga Bëngbe Bëtsá  
ndoñe chematanoyeuná causa, ndoñe judiënga  
tmonjántatsëmbona ndayá bëtsemnana Bëngbe

Bëtsábeyeca atsbocaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsíyentsbuaše.

<sup>12</sup> Judiënga bacna soyënga tmojanma causa, inÿe entsanga quem luarentše tmojobená ba tšabe soyënga jtsebomnama. Chë judiënga tmonjanorrebajá causa, chë ndoñe judiënga ba tšabe bendicionënga Bëngbe Bëtsábentšana tmojoshachiñe. Y chca, chë bëtscá judiënga Bëngbe Bëtsá játsebacama, chënga atsebácanënga chamojtsemna ora, más bëtscá tšabe bendicionënga Bëngbe Bëtsábentšana nÿetsca entsangbiama echántsemna.

<sup>13</sup> Ntšamo mora chanjayancá, tšëngaftanga ndoñe judiëngbiama entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerte uámana trabajo stsebomna ca.

<sup>14</sup> Atše sëntsobátmana, quem trabájoca atše jobenayana jamama chë cach atscá buiñe bomna entsanguentsënga, ndayá chë ndoñe judiënga Bëngbe Bëtsábentšana tmojoshachiñcá chamotsíyentsbuaše, y chca, ndayá tijamama, Bëngbe Bëtsá chënguentsana báseftanga cháuatsebacama.

<sup>15</sup> Er chë judiënga Bëngbe Bëtsá tojtsanëbaté ora, cha tojanma inÿe entsanga quem luarentše cháftaca tempcá tšabá chamotsatsmënama; y chënga cha chamojoyeuná ora, corente tšabá echántsemna, nÿa chënga mo obanënga cuabmëncá y cuaftsatayanëngcá.

<sup>16</sup> Nda canÿe arninÿentsana chë natsana tandëse Bëngbe Bëtsabiama joserviama yojtsemna ca tojayanëse, jtsemnana mo nÿetsana chabiama

cuaftsemncá. Canye betiyentša tbëtëjënga Bëngbe Bëtsabiamá yojtsemna ca canya tojayanëse, nyetsca chë betiyentša buacuafjëgnaca Bëngbe Bëtsabiamá jtsemnana.

17 Chë judiënguentše báseftanga Jesucristbeñe ndoñe montsanošbuaché ora, tsëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canye jena olivo betiyentšana entsanga tmojatëtše buacuafjëngcá, y tsëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tsëngaftanga Bëngbe Bëtsábentšana cachca tsabe soyënga chë judiëngaftaca šmontsebmna, mo chë jena buacuafjënga y cachentša buacuafjënga cach tbëtëjentšana lempe cuaftsoyëngacañcá.

18 Ndoñe šmattsenábotamnaye, tsëngaftanga Bëngbe Bëtsabe tsabe soyënga šmojtsebmnama, chë Jesucristbeñe ndoñe montsanošbuaché judiëngbiamá yojamna soyënga. Smochtsejuabnaye, buacuafjëngna chë tbëtëjëngayeca vida jtsebmnnana, y ndoñe tbëtëjënga chë buacuafjëngayeca; cachcá, tsëngaftanga nje Bëngbe Bëtsábeyeca chë tsabe soyënga šmojtsebmna.

19 Pero tsëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsënjanobená mo buacuafjënga betiyiñe jenëfjëngcá chca tsabe bendicionënga Bëngbe Bëtsábentšana jóyëngacñana ca.”

20 Ndegombre, chënga Jesucristbeñe

ndoñe montsanošbuaché causa, mo buacuetëtšenëfjëngcá tmonjanoquedá, pero Jesucristbeñe šmojtsošbuáchema, tšëngaftanga šmojoquedá Bëngbe Bëtsábentšana tšabe bendicionënga jtsoyëngacañcá. Chcasna, chama ndoñe šmattsenábotamnaye; más tšabana cuedado jtsebomnana.

21 Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entšanga bëtsemnamna, monjamna mo cach betiyentša buacuafjëngcá; tšëngaftanga, chë mo betiyiñe jena buacuafjëngcá šmognënga, cha cach ndoñe quecmochátaperdonaye, chábeñe ošbuáchiyana šmojtšajbanase.

22 Bëtscá šmochtsejuabnaye Bëngbe Bëtsá puerte tšabia yomnama, pero cha tšatjayá yomnámnača šmochtsejuabnaye; tšatjayá endmëna chë bacna soyënga tmojtšamëngaftaca, pero tšëngaftangaftacna puerte tšabia. Cha tšëngaftangaftaca chca echántsemna, tšëngaftanga chca chašmojtšomerecénëntscuana; pero ndóñesna, Bëngbe Bëtsá echanjama tšëngaftángnaca mo buacuetëtšenëfjëngcá chašmoquedama, chë tšabe bendicionënga Bëngbe Bëtsábentšana ntsoyëngacañcá.

23 Y ntšamo mora imojtsejuabnacá chë judiënga tmojatrocá y tmojontsé Jesucristbeñe jtsošbuáchiyana, chëngnaca cachiñe chë tšabe bendicionënga Bëngbe Bëtsábentšana mochanjóyëngacñe, y mochántsemna mo betiyiñe jena buacuafjëngcá, er Bëngbe Bëtsá becá obenana

endbomna jamama ntšamo chë judiënga tempo imojanbomncá cachiñe chamotsatsbomnama.

<sup>24</sup> Chcasna, más paselo jtsemnana canye jena olivo betiyentša buacuatétšenëfja cach betiyiñe jétsjena, y ndoñe, chë tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsošbuaché judiëngbiama, jóntsana jtošbuáchiyana y tsabe bendicionënga Bëngbe Bëtsábentsana jóyëngacñana, tsëngaftanga ndoñe judiënga chë tempo Bëngbe Bëtsá ndoñe šmonjanábuatmëngbiama.

*Bëngbe Bëtsá nyetscángaftaca puerta tsabia endmëna*

<sup>25</sup> Jesucristbeyeca catsátanga, atše sëntseboše tsëngaftanga chašmotsetátšëmbo chë tempo Bëngbe Bëtsá entsanga ndoñe tonjaninyanýe soyëngama. Atše sëntseboše tsëngaftanga quem soyëngama chašmotsetátšëmbo, chca, tsëngaftanga ndoñe judiënga chë judiëngbiama más uámanënga šmomna ca ndoñe chašmondëtsejuabnama. Ndayá Bëngbe Bëtsá tempo entsanga ndoñe tonjaninyanýecá, quem soye endmëna: Bëngbe Bëtsá tojalesenciá, nye baseftatescama banga Israeloquënga Bëngbe Bëtsabe soyënga ainaniñe ndoñe chamondóyëngacñama; pero chca echántsemna, chë ndoñe judiënguentše atsebácanënga jtsamnama imomnënga, atsebácanënga chamojtsemnëntscuana.

<sup>26</sup> Chca chaojopasá ora, nyetsca Israelentša entsanga atsebácanënga mochántsemna; ntšamo



Bëngbe Bëtsabe uabemana palabrënguifne endayancá:

Entšangbe atsebacayá Israelocana echanjabo,  
y echanjama nÿetsca Jacóbëbentsana entsanga  
ndoñe más vida chamondëtsebomna,  
bacna soyënga jtsamëse ca.

<sup>27</sup> Y mëntsá endmëna ntšamo chëngbiana ch-  
jašebuachená:

chënga játsebacana, chëngbe bacna soyëngama chai-  
japerdónaye ora ca –chiñe endayana.

<sup>28</sup> Chë tšabe noticiënga tmojtsanaboté causa,  
judiënga Bëngbe Bëtsabe uayayënga mondmëna,  
chca, tšëngaftangbe tšabiana chaotsemnama. Pero  
Bëngbe Bëtsá tojánabacacayeca, chëngnaca Bëngbe  
Bëtsabe bonshánënga mondmëna, er Bëngbe Bëtsá  
chëngbe tempsca uámana bëts taitanga chca to-  
janašebuachená.

<sup>29</sup> Chca endmëna, er Bëngbe Bëtsá ndocna te  
juabna ntjatrócana; nÿetscanga chabe entsanga  
chamotsemnama tojáchembënga, nÿets tempo cha  
echántsababuanÿeshana, y echanjama chëngbeñe  
tšabe bendicionënga chaotsemnama.

<sup>30</sup> Tšëngaftanga ndoñe judiënga tempo ndoñe  
šmonjánama ntšamo Bëngbe Bëtsá inabošcá;  
y mora, Bëngbe Bëtsá tcmojalastemá, judiënga  
Bëngbe Bëtsá ndoñe tmonjoyeuná causa.

<sup>31</sup> Cachcá, Bëngbe Bëtsá tšëngaftanga  
tcmojalastemama, judiënga montsemna chë Bëngbe  
Bëtsá ndoñe montsobedecénënga, chca, Bëngbe  
Bëtsá chëngnaca cháualastemama.

<sup>32</sup> Er Bëngbe Bëtsá tojinÿanÿé, cha ndoñe ntjoye-  
unayama juabnëngaca nÿetscanga mandánënga

imomnama, chca, nÿetscanga jálastemama cha jobenayama.

<sup>33</sup> ¡Ndegombre, Bëngbe Bëtsá nÿetscangbiamapaerte tšabia endmëna, puerte osertaná y puerte obiashjachá! Ndocná quenátobena ínÿenga jábuayenama ndayá Bëngbe Bëtsá jamama inetsejuabnaycá, y ndocná quenátobena corente josértana ntšamo cha inetsamcá.

<sup>34</sup> Ntšamo Bëngbe Bëtsabe uabemana palabrënguiñe endayanacá:

Ndocná quenátstatšëmbo ntšamo Bëngbe Bëtsá inetsejuabnaycá;

ndocná quenátobena cha jábuayenama ndayá jamana ibomnama.

<sup>35</sup> Ndocná quenátobena ndayánaca cha natsana jshatšetayana, chë tbojatšetabiaman debená cha jatsmënama,

y chë ndebénama ndayánaca jtoyiyama chabotssemnama ca.

<sup>36</sup> Er lempe cha tojama, lempe cha iútabna, y lempe chabiamayomna. ¡Nÿetscanga nÿetsca tescama cha chamotsatschuaná! Chca chaotsemna.

## 12

### *Ntšamo jtsiyenëse Bëngbe Bëtsá jtseservénama*

<sup>1</sup> Chcasna, Jesucristbeyeca catšátanga, Bëngbe Bëtsá bënga ba soye šojalastemáyeca, puertebontsaimpadana, tšëngaftanga Bëngbe Bëtsá chašmëyana tša šmojtseboše lempe jamana chábioye jadórama ca, Bëngbe Bëtsá jadórama mo ndayá cuafjobacá y cuafjuatšëmboncá, mo cabá ainá cuafsomñcá. Smochjauyana tšëngaftanga

sempre šmochtsentsēna cha servénana y jtsamēse cha tšabá bēngaftaca chaotsemnana. As, chca chašmojtsama ora, ndegombre oyejuayá Bēngbe Bētsá šmochántsebiamnaye.

<sup>2</sup> Ndoñe šmattsiyena jtsamēse ntšamo chē n̄ye quem luarama enójuabnaye entšanga monduamancá, y šmochjaleséncia Bēngbe Bētsá mo tsēm entšangcá chácmbiamama, tšēngaftangbe ainana y juabna mo tsēm cá chaomēse. Chca, tšēngaftanga šmochanjobenaye jtsejuabnayana y šmochántsetatšēmbo ntšamo Bēngbe Bētsá yobošcá: ndayá tšabá yomna, chē ndayá cha oyejuayá ibnabema, y ndayá ya ndoñe yondopodena más tšabá jtsemnana.

<sup>3</sup> Ndayá Bēngbe Bētsá atšbiana tšabá jtsejuabnayēse šojatšetama, n̄yetsca tšēngaftanga cbochjáuyana, ndocná cachabiana chaondētsejuabná más uamaná yomna ca, n̄ye ntsachetšá jtsejuabnayana ibomna n̄yetšá. Más tšabá, cada ona cachabiana tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chē Bēngbe Bētsá tbojatšetá ošbuáchiyana chabiana chaotsetrabájama.

<sup>4</sup> Er, ntšamo bēnga cada ona mondbomna can̄ye cuerpo y chē cuerpiñe ba soyēnga jtsebomnana, y n̄yetsca soyēnga ndoñe cach soyama cuerpiñe ntso servénana,

<sup>5</sup> cachcá bēnga ošbuáchiyēnga, masque bētscanga imomna, Crístoftaca cán̄yiñe mo can̄yacá mondmēnayeca, bēnga mondmēna mo chabe cuerpo cuaftsemncá, y cada ona cán̄yiñe mo can̄yacá n̄yetścángaftaca.

<sup>6</sup> Bëngbe Bëtsá tojama bënga cada ona chamotsebomnama ndoñe cachca chabe tšetana obenana, ntšamo Bëngbe Bëtsá cada ona bëngbe tšabiana inajuabnaycá. Y chabe juábnaca bënga jtsóyebuambnayama jtsobenama Bëngbe Bëtsá tojamëse, chca mochtsama ntsachetšá chábeñe bëngbe ošbuáchiyana yomncá.

<sup>7</sup> Ošbuáchiyënga bëtscá jasérviana bënga chamotsobenama Bëngbe Bëtsá tojamëse, chca mochtsama. Tšabá jtsabuátambayama bënga chamotsobenama Bëngbe Bëtsá tojamëse, chca mochtsama.

<sup>8</sup> Inyënga jañémuama bënga chamotsobenama Bëngbe Bëtsá tojamëse, chca šontsamna. Lempe ntšamo bënga tmobomncá inyëngbiámnaca chaotsemnama bënga jamama chamotsobenama Bëngbe Bëtsá tojamëse, nyets ainánaca chca šontsamna. Amëndayënga jtsemnama bënga chamotsobenama Bëngbe Bëtsá tojamëse, šontsamna bëtscá jamana tšabá jtsamëndayama. Inyënga jálastemama bënga chamotsobenama Bëngbe Bëtsá tojamëse, šontsamna oyejuayënga chca jamana.

*Ntšamo bënga Jesucristbeñe ošbuáchiyënga jtsamana šojtsamna*

<sup>9</sup> Inyá chašmojtsebobonshana ora, nyets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentsena ntšamo tšabá yomncá jtsamama.

<sup>10</sup> Cmontsamna nyetscanga puerte jtsenbobonshánana, Jesucristbeyeca catšátanga quetsomñecá,

chë ínÿenga bëngbiana más uámanënga imomna ca jtsejuabnaye.

<sup>11</sup> Ndoñe oyëñjayënga šmattsemna, ndayá bëtscá Bëngbe Utabnabiana šmochtsetrabájaye; ainaniñe corente añemo jtsebomñese, Bëngbe Utabná sempre šmochtse servena.

<sup>12</sup> Tšëngaftanga Bëngbe Bëtsábeñe jtsošbuáchiyëse, chábeñe šmobatmánayeca, puerta oyejuayënga šmochtsemna; padecena soyënguiñe chašmojtsachñëjuana ora, puerta uantadënga šmochtsemna, y siempre Bëngbe Bëtsáftaca šmochtsencuëntaye.

<sup>13</sup> Bëngbe Bëtsabe entšanga opresido bomñënga šmochjújabuache, y šmochtseprontana tšëngaftangbe yebnentše posada ínÿenga júyentšamiana.

<sup>14</sup> Bëngbe Bëtsá šmochtseimpadana, chë tšëngaftanga chašmosufrima amëngbiana tšabe bendicionënga cha chaotsamama; aíñe, cha šmochjaimpáda tšabe bendicionënga chëngbiana chaotsamama, bacna soyënga ndoñe.

<sup>15</sup> Oyejuayënga ínÿengaftaca šmochtsemna, chënga oyejuayënga chamojtsemna ora; ngménaca šmochtsemna, ínÿenga ngméniñe chamojtsemna ora.

<sup>16</sup> Šmochtsiyena nÿetscanga jtsenëyeunanëse. Nÿe cach tšëngaftanga uámanënga ndoñe šmattsenobiamnaye, sinó chë nduámanënga imomñëngaftaca tšabá mándbomñënga šmochtsemna. Ndoñe šmattsejuabnaye yapa osertánënga šmomna ca.

<sup>17</sup> Inÿenga bacá chacmojtsaborlana ora, ndoñe šmattsatëchënguaye; corente šmochtsentšena

ntšamo nyetsca entsangbiana tšabá yomncá jtsamama.

<sup>18</sup> Ntsachetšá šmojobenacá, lempe šmochtsama natjěmbana nyetsca entsángaftaca jtsiyenama.

<sup>19</sup> Atšbe bonsháněnga, ínŷenga bacá chacmojtsaborlana ora, ndoñe šmatjama chěnga chě causa chamotsesufrínama, ndayá Běngbe Bětsá šmochjaleséncia chěnga cháuacastigama; er Běngbe Bětsabe uabemana palabrěnguiñe cha tojánayana: “Atše chanjama chěnga chamosufrima, ínŷenga chamosufrima tmojama causa; y chěnga chanjácastigaye, ínŷengbioye bacá tmojaborlá causa ca.”

<sup>20</sup> Chca játamamna, měntšá šmochjama, ntšamo cachánaca tojanayancá:

Acbe uayayá tbojtseshěntsaněse, saná cochjacaredáda, y tbojtsajuendase, cochjuáfsiye.

Chca chacojaměse, cochanjama cha puerte chaotsěuatja ntšamo tcmojaborlama, y ainana corente chabotsetšena, mo chebana iñbenga chabe bestšašiñe cuafjacjacá ca.

<sup>21</sup> Ndoñe šmatjaleséncia, ntšamo ndoñe tšabá tontsemncá tšěngaftanga chacmayěnjanama. Chamna, ntšamo tšabá yomncá jtsaměse, chě ndoñe tšabe soye šmochjayějaná.

## 13

<sup>1</sup> Nyetsca entsanga entsamna jtsamana ntšamo chě aměndayěnga tmojtsaměndacá, er ndocná obenana ntsebomnana, Běngbe Bětsá ndoñe chca tbonjalesenciase, y nŷe Běngbe Bětsá tojama aměndayěnga obenana chamotsebomnama.

2 Chca, chë amëndayëngbe contra tmojtsemnëngna, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna;

3 er ntšamo tšabá yomncá amënga, ndoñe quenátamna ndayama chë amëndayënga jatebëuatjana, nÿe chë bacna soye amëngna aíñe. Tšëngaftanga šmojtseboše jtsiyenama chë amëndayëngbiøye ntjatebëuatjá; chcasna, ntšamo tšabá yomncá šmochtsama, y chë amëndayëngna tšabe bomínÿeca mochantsonÿaye ntšamo chašmojtsamcá;

4 er chë amëndayëngna Bëngbe Bëtsabe trabajo amënga mondmëna, tšëngaftangbe tšabiamna. Pero bacna soyënga šmojtsamësna, cmontsamna jtsiyenana chë amëndayënga jtsebëuatjëse, er chënga jacastígama obenana mondbomna, y chca mondbétsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima.

5 Chíyeca, jtseytana ntšamo chë amëndayënga tmojtsichamcá jtsamana, pero ndoñe nÿe chë castigo ndoñe chašmondétsebonnama, ndoñe chca šmontsama causa, sinó chë ainanentsa tšabe juabnënga ntšamo tbojtsëtsëtsnacá joyeunayama yómnayeca.

6 Cachca soyëngama, amëndayëngbiama impuesto tšëngaftanga jtsatsquécjnayana; er chë amëndayënga Bëngbe Bëtsabe oservénënga mondmëna, ntšamo chíñe jtsamama tojtsamncá corente tmojtsentšena ora.

7 Chcasna, tšëngaftanga šmochjáyentšbuachiye

ntšamo chënga jtsebomnama tojtsamncá. Chë crocénana entsanga ayëngacayëngbioye, ndaye impuéstnaca šmochtëbuénaye; chëngna šmochtsarrespectana ntšamo yomncá, y chënga uámanënga chamotsemnana šmochtsejuabnaye.

8 Crocénana inya jëtsëntšabuáchiyama chacmojtsamnëse, nÿe ntoiyicá ndoñe šmatjoquéda, nÿets tempo ndebénënga; nÿe quem soye sempre šmochtsama: nÿetscanga šmochtsenbobonshana; er nda ndëmua entsábioye tbojtsebobonshana, ya tojama ntšamo leyinë yomandancá.

9 Quem mandënga, “ache shema ínÿaftaca ndoñe cattseíngñaye, inya ndoñe catjóba, ndoñe catjatbëba, inya tojtsebomna soye ndoñe nÿe acbiama cattseboše”, y chë inÿe mandënga leyinë lempe quem mandiñe entsemna: “Ndëmua entsánaca cochtsebobonshana ntšamo cach aca cuenobobonshancá”.

10 Nda ndëmua entsábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entsá jamana lempe ntšamo leyinë yomandancá.

11 Chë soyënga cmontsamna jtsamana, er bënga mondétatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentsana cuafjofšenangcá, Jesucristo jaserviama jtsentsénëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontsé ora enjamnama.



12 Mora bēnga mondoyena canye luarentše bētsá bacna soyēngaca y ngmenánaca, y chca jtsemnana mo bēnga nyets tempo ibetiñe cuaftsajncá. Pero ya entsobeco chē Bēngbe Bētsá bēnga játsebacama te, mo chē ibetiñe ya jtsopochócama y binyniñe ya jontšamcá. Chíyeca mochtsajbaná bacna soyēnga amana, y mochtsiyena tšabe soyēnga jtsamēse, Satanás játsjama y jáyēnjanama bēnga jtseprontánese, mo canye soldado jenēuyanama y inya jayēnjanama ba soyēnga tojenocjacá.

13 Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínñengbiamama lempe chaotsinynēse. Chcasna, ndoñe quešnátamna yapa tmoyēnga ntsemnana, ndoñe fiestēnguenache ndoñe tšabe soyēnga ntsamana, ndoñe bacna soye boyabása o shembásaftaca ntsamana y jenomándama ntobencá chca soyēnga ndoñe ntsamana, nyetscanga ndoñe cachcá ntsejuabnayama ndoñe ntsamana y ndoñe ínñyēnga yapa ntsíyentšbuašana.

14 Chca játamamna, šmochtsiyena jtsamēse ntšamo Bēngbe Utabná Jesucristo endbetsamcá, y ndoñe nye šmatjésejuabnaye jtsamana nye cach tšēngaftanga tšabá jtsomñama juabnēngaca, ndayá tšēngaftanga chašmotsamama chē juabnēnguiñe tojtsemncá.

## 14

*Ndoñe šmattsóyebuambnaye inye ošbuáchiyēngbe contra*

<sup>1</sup> Chē Jesucristbeñe nye batsatema ošbuáchiyēnga tšabá šmochjúbuaja, y chēngaftaca ndoñe

šmattsenatsëtsnaye ndayá aíñe o ndoñe jamana yontsamnama.

<sup>2</sup> Er básefta ošbuáchiyënga corente imotátšëmbo chënga nÿe ndayánaca jasama imobenama, pero chë Jesucristbeñe nÿe batsatema ošbuáchiyënga, ndocna mëntšena ntsesayana, er chënga jtsejuabnayanana aíñe jasana canÿe bacna soye nántsemna ca.

<sup>3</sup> Chë nÿetsca saná sayënga ndoñe chamondëtsejuabná chë inÿe soyënga ndoñe mondëtsesayëngbiana, chë causa chënga más batšá uámanënga imomna ca; y chë ndaye soyënga ndoñe mondëtsesayëngna, chë nÿetsca saná sayëngbe contra ndoñe chamondëtsoyebuabná, er Bëngbe Bëtsá chënga tojúbuaja mo chabe entšangcá.

<sup>4</sup> Tšëngaftanga ndoñe quecmátamna chë ínÿabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chë oservená jamana ntšamo tbojtsemncá, er Bëngbe Utabná obenana endbomna cha chca chaotsamama.

<sup>5</sup> Báseftanga mondmëna, chënga jtsejuabnayanana canÿe te inÿe tescama más uámana te yomna ca; pero ínÿengna jtsejuabnayanana cada te cachcá iuámana ca. Y entsemna ndayá cada ona corente tšabá chaotsetátšëmbo, ntšamo yojuabnacá ndáyeca chca ca.

<sup>6</sup> Nda tojtsejuabná canÿe te inÿe tescama más uámana te yomna ca, chca jamana Bëngbe Utabnábiama jtenójuaboyama. Y nda nÿetsca saná tojtšesá, chca jamana Bëngbe Utabnábiama jtenójuaboyama, er cha Bëngbe Bëtsábioye chë sanama jëtschuayana; y nda tojtsejuabná sananga

yomna y ošbuáchiyënga chcana chamotsesama Bëngbe Bëtsá ndoñe yondboše ca, cha chë soyënga ndoñe ntjasana, Bëngbe Utabnabiamama jtenójuaboyama, y chánaca Bëngbe Bëtsábioye chë sanama jëtschuayana.

<sup>7</sup> Bënga ošbuáchiyënguentšana ndocná ainá ntsemnana nÿe cachabiamama, ni jóbanana nÿe cachabiamama.

<sup>8</sup> Bënga tmojtsiyenëse, Bëngbe Utabnabiamama jt-siyenana; y tmojóbanësna, Bëngbe Utabnabiamama jóbanana. Chca, masque ainënga o obanënga, bënga Bëngbe Utabnábengama jtsemnana.

<sup>9</sup> Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainëngbeñe y chë ya tmojóbanëngbeñe chaotsemándama.

<sup>10</sup> As, ¿ndáyeca tšëngaftanguentšë báseftanga, catšátangbe contra jtsóyebuambnayana, ndayá chënga tmojtsamama? ¿Y ndáyeca ínÿënga tšëngaftanguentšë jtsichámuana, catšátanga ndoñe uámanënga montsemna ca, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tšabá o ndoñe tšabá bëtsemnana cha cháuyanama.

<sup>11</sup> Er Bëngbe Bëtsabe uabemana palabrënguiñe Bëngbe Utabná mëntšá tojánayana:

Ndegombre atše ainá sëndëtsomñe, y chíyeca atše  
šcojurá,

nÿetscanga atšbe delante mochanjoshëntsaméntša  
atše jadórama,

y nÿetscanga šmochanjauyana, “ndegombre aca  
Bëngbe Bëtsá condmëna ca”.

12 Chcasna, cada ona bēnga šontsamna Bēngbe Bētsá jauyanana ntšamo tmojamama ndáyeca chca ca.

*Ndoñe šmatjama inye ošbuáchiyēnga bacna benachiñe chamótsatšama*

13 Chíyeca, ya ndoñe quešnátamna ínýengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucrístbeyeca acbe catšata, chaojuabó y bacna soyēnga chaoma.

14 Atše sēndētatsēmbo, mo canya Bēngbe Utabnáftaca cányiñe mo canyáca quetsomñecá, ndocna soye yondmēna, nýe cachabe ponto chaotsemna ndoñe tšabe soye. Pero canye entšá tojtsejuabná ndayánaca ndoñe tšabe soye yondmēna ca, ni jasama, ni jabojuama, chabiana cocayé chē soye nýets tempo jéftsemnana ndoñe tšabe soye.

15 Tšēngaftanga inya becá šmojtsatsētná, inye soyēnga tšabá endmēna jasama ca, y cha tojtsejuabná, chca soyēnga jasama ndoñe tšabá yondmēna ca, pero tšēngaftanga tša šmojtsatsá causa, cha chca soyēnga tojase, y chentšana tbojtsebiona puerte bacna soye tojamama, chca, tšēngaftanga jtsinýanýnayana ndoñe šmondoyena jtsamēse chē ínýenga jtsababuánýeshanēse. Nýe tšēngaftanga inye soyēnga šmétsesayama ndoñe šmatjaleséncia chē soye chaoma inya, ndabiana Cristo tojanóbana, chē ndoñe ndegombre benachiñe chaoquedama.

16 Ndoñe šmatjaleséncia ndayá tšëngaftanga tšabá šmétsamama, ínÿenga ndoñe tšabá tšëngaftangbiamama chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tšabá tmontsoyebuambná ora.

17 Bëngbe Bëtsabe amëndayana bëngbeñe ndoñe quenátsmëna inÿe soyënga aíñe jasana o inÿe soyënga ndoñe, canÿe soye aíñe jofšiyana o inÿe soye ndoñe. Pero chabe amëndayana bëngbeñe aíñe endmëna jtsamana soyënga ndayama Bëngbe Bëtsá tojayana aíñe tšabá jamama yomna ca, cháftaca tempcá tšabá jtsatsmënana y ainaniñe oyejuayana jtsebomnana; y Uámana Espíritbeyeca bënga jobenayana chca jamana.

18 Y nda Crístbioye chca tbojtseserverna, jamana Bëngbe Bëtsá cháftaca oyejuayá chaotsemnana, y entšangbe bominÿiñe tšabia jtsemnana.

19 Sempre šontsamna tšabe soyënga jtsamana y chë soyëngaca chaopodé jamana nÿetscanga natjëmbana chamotsiyenama, y ndaye sóynaca šmochtsama, ndayá ínÿenga chaújabuache Jesucrístbeñe corente jtsošbuáchiyama y ainaniñe bëtscá añemo jtsebomnana.

20 Tšëngaftanga ndaye sanánaca jasama šmobénayeca, ndoñe šmatjama chaot-sopochocama ndayá Bëngbe Bëtsá ainaniñe tojamcá. Ndegombre, nÿetsca sananga tšabá jasama endmëna; pero ndayá tšëngaftanga šmojasama, inÿa bacna benachiñe chaótsatsama šmojamëse, chë soye cocayé ndoñe tšabá ntsemnana.

21 Tšabá endmëna mëntsëna ndoñe ntjasana,

vínoye ndoñe ntjofšiyana o ndayánaca ndoñe ntjamana, pero chë soye aíñe tcojama ora, Jesucristbeyeca canye catšata chaojuaboma y bacna soye chaomama tojoservese.

<sup>22</sup> Asna, ntšamo tšëngaftanga chë soyëngama ndegombre šmošbuachecá, nÿe Bëngbe Bëtsá y tšëngaftangaftaca chaotsemna. Canye entšá ndegombre oyejuayá jtsemnana, canye soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebonnëse.

<sup>23</sup> Pero canye entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aíñe tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

## 15

*Ntšamo ínÿengbiama tšabá tojtsemncá mocht-sama, ndoñe nÿe bëngbiama*

<sup>1</sup> Bënga, chë Jesucristbeñe corente ošbuáchiyënga, šontsamna chë nÿe batšatema ošbuáchiyënga jujabuáchana, chënga bacna soyënga tmojtsama ora, nÿe batšá ošbuáchiyana bomna causa; y ndoñe nÿe jatsënguayana nÿe ndaye soyëngaca yopodena bënga tšabá jtsemnama.

<sup>2</sup> Cada ona bënga šontsamna jamana ntšamo cach bëngcá Jesucristbeñe ošbuachiyabiama tšabá tojtsemncá, y ndayá cha oyejuayá chaotsemnama tojama soye. Chca šontsamna, cha más bëtscá

Jesucristbeñe chaotsošbuáchema, y ainaniñe más añemo chaotsebomnama.

<sup>3</sup> Er Cristo, ntšamo tojanmcá cach ndoñe tonjanma nñe cha oyejuayá jtsemnama. Inyetsá, cháftaca tojanopasá ntšamo Bëngbe Bëtsabe uabemana palabrenguiñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.”

<sup>4</sup> Er lempe ntšamo tempo Bëngbe Bëtsabe uabemana palabrenguiñe tmojanabemcá, bënga jabuátambama endmëna. Ndayá bënga chiñe tmojuatsjínýama, bënga jtsoobenana padecena soyënguiñe tmojtsachnëjuana ora uantadënga jtsemnama, y ainaniñe más añemo jtsebomnama; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama.

<sup>5</sup> Atše, Bëngbe Bëtsá sëntseimpadana, nda inétsama bënga padecena soyënguiñe uantadënga chamotsemnama, y nda inétsama bënga ainaniñe más añemo chamotsebomnama, cha chaoma nyëtscanga canye juabna chašmotsebomnama, ntšamo Cristo Jesús yojanjuabnacá tšëngaftanga jtsejuabnayëse;

<sup>6</sup> cha chca chaoma, nyëtsca tšëngaftanga mo cánýiñe cuaftsemncá, y mo nyëtscanga canye ora cuafjayancá, Bëngbe Bëtsá, Bëngbe Útabná Jesucristbe Taitá, puerte bëtsá y uamaná yomnama chašmuinýanýema.

*Chë ndoñe judiëngbiámnaca chë tsabe noticiënga jtsemnana*

<sup>7</sup> Njetscanga oyejuayënga šmochjenofja, ntšamo Crístnaca tsëngaftanga tcmojanëbuajcá, chca, entšanga chamuinýanyé Bëngbe Bëtsá puerte bëtsá y obená yomnama.

<sup>8</sup> Atše sëntseboše ndayá jayanana, Cristo tojánabo judiënga jabáserviama ca, chca, jinýanyiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima;

<sup>9</sup> y Bëngbe Bëtsá puerte bëtsá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí:

Chíyeca, atše chë ndoñe judiëngbeñe chaitsemna ora, aca cbochantsatschuanaye, Bëngbe Bëtsá;

y jacántase chanjayana aca puerte bëtsá y uamaná comna ca.

<sup>10</sup> Inyoca mëntsá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entšángaftaca cánýiñe ca.

<sup>11</sup> Y inyoca mëntsá endayana:

Bëngbe Utabná šmochtsatschuanaye tsëngaftanga ndoñe judiënga,

y cha šmochtsatschuanaye njetsca tsëngaftanga nyets luarënguenache entšanga ca.

<sup>12</sup> Y Isaiásnaca Bëngbe Bëtsabe uabemana palabrenguiñe mëntsá tojanábema:

Canýa Isaíbe entšanguentšana echanjabo,



y Bëngbe Bëtsá chábioye uamaná bochanjábema,  
nyets luarënguenache entsanga chaot-  
samëndama,

y chënga chábeñe jtsošbuáchiyëse, chábeñe  
mochantsobátmana tšabe soyënga  
chëngbiana chaotsamama ca.

<sup>13</sup> Atše, Bëngbe Bëtsá sëntseimpadana, nda  
inétsama bënga chábeñe chamotsobátmanama  
tšabe soyënga bëngbiana chaomama, cha  
chaoma tšëngaftanga ainaniñe puerte oyejuayënga  
chašmotsemnama y ainaniñe tšabe ebionana  
chašmotsebomnama, chábeñe jtsošbuáchiyëse;  
y Bëngbe Bëtsá chca tšëngaftangbiana  
chaoma, tšëngaftanga cada te más chábeñe  
chašmotsobátmanama, chë Uámana Espiritbe  
obenánaca.

<sup>14</sup> Jesucristbeyeca atšbe catsátanga, atše  
corente sëndétatšëmbo tšëngaftanga puerte  
tšábenga šmomnama, ndayá cmamnama  
corente šmotatšëmbuama, y jtšenbuayiynayama  
šmobenámna.

<sup>15-16</sup> Quem tsbuanáchañe básefta soyëngama  
sënjuábema, ntšamo šmatjátsjuabnayama atše  
ntjatauatjácá; chca sënjama, básefta soyëngama  
chašmuatenójuaboma; y chca sëntsobena  
juabemana, er Bëngbe Bëtsá tojama atše  
chaitsebomna chë uámana trabajo, Cristo  
jtseservénana, chë ndoñe judiënga jtsëjabuáchanëse.  
Atše bachnëcá sëntsoservena, Cristo stseservena  
ora, entsanga tšabe noticiëngama jtsabuayiy-  
nayëse; atše chca sëndama chë ndoñe judiënga  
Jesucristbeñe chamotsošbuáchema, y ndayánaca  
chamotsamama Bëngbe Bëtsá oyejuayá

chëngaftaca chaotsemnana, mo chabiama canÿe uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

<sup>17</sup> Chca, atše Cristo Jesúseftaca cánÿiñe mo canÿacá quetsomñecá, ndegombre sentsobena jtsejuabnayana ntšamo Cristo jaserviama atše sëndamcá, puerte uámana soye yomnana.

<sup>18</sup> Atše añemo sëntsebomna nÿe chë ndayá Cristo átšeftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama,

<sup>19</sup> chë Bëngbe Bëtsabe obenana jinÿanÿiyama bëts soyëngama, chë chabe obenánaca tojopasá tšabe soyëngama, y chë Uámana Espíritu bëts obenánaca tojama soyëngama. Y chca, Jerusalenocana jabojátšase, nÿetsca luarënguëjana Iliria luaróntscoñe, Cristbe tšabe noticiëngama nÿets luarënguenache entšanga tijabuayená.

<sup>20</sup> Atše sempre canÿe soye inÿe soyëngama más sënjánboše, y enjamna chë tšabe noticiëngama jábuayenana, entšanga ndocna te Cristbiamama oye-buambnayana tmonjanuena luarënguenache; y chca sënjanma, atše ndoñe játamama inÿa tojanbojatšé trabajo, mo ínÿabe bojatšena yebnentše jajebuama cuafjatontšecá.

<sup>21</sup> Ntšamo Bëngbe Bëtsabe uabemana palabrënguiñe endayancá, chë tempo Cristbiamama ndoñe tmonjanuenëngbiamama:

Chë ndëmuanyënga tempo ndocná chabiama tonjanabuayená, chënga tšabá mochanjinÿe ntšamo cha yomnana;

y chë ndocna te chabiamá tmonjouenënga, chabe soyëngama echanjósertaye ca.

*Pablo yojanjuabná Roma bëts puebloye jama*

<sup>22</sup> Y nÿa chë causa, atse ndoñe chiyjobená tšëngaftangbioye jana tšëngaftanga jányama, masque ba soye tsjenojuabná choye jama.

<sup>23</sup> Pero mora atšbe trabajo quem luarënguiñe sënjapochocá y tempscana tšëngaftanga jányama tša sëndánbošeyeca,

<sup>24</sup> sëntsejuabná mora aíñe chjobenaye choye jama, tšëngaftanga jautsëtsayama, chëjana chajachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjányama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátšetaye jobenayama Españoye ayana jtëtóntšama.

<sup>25</sup> Morna Jerusalenoye chanjá, choca entsanga Bëngbe Bëtsábenga imomnënga jaujabuáchama;

<sup>26</sup> er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entsanga, Bëngbe Bëtsábenga imomnënga y ndbomnëjémënga imomnënga jujabuáchama; y oyejuayënga chca tmonjama.

<sup>27</sup> Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábiocana tmojanóyëngacñe soyënga ndoñe judiëngnaca chamotsebomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye

soyënga jatšatayëse, chënga vida jtsebomnama chamotsobenama.

<sup>28</sup> Y chca, quem trabajo chajapochocá ora, y chë ndoñe judiënga ošbuáchiyënga lempe tmojátbanana chajáftsayentšbuachiye ora, chanjontsé España ye jama, y tšëngaftangbiajana chanjachnëngo tšëngaftanga jáftsanÿama, tšëngaftangaftaca baseftayté jëftsemnama.

<sup>29</sup> Atše corente sëntsetatšëmbo tšëngaftangbioye chajá ora, chjášhango y chjama tšëngaftanga bëtscá tšabe bendicionënga Crístbentsana chašmotsebomnama, tondaye chacmondëtsabuáshebenëntscuana.

<sup>30</sup> Jesucrístbeyeca catšátanga, Bëngbe Utabná Jesucrístbeñe ošbuáchiyënga quetsomñecá, y bënga bonshánana chamotsebomnama chë Uámana Espíritu inétsamayeca, tšëngaftanga cbontsaimpadana, bëtscá chašmotsentšena Bëngbe Bëtsá nÿets ainánaca jtseimpadánama, ntšamo atše sëndbetseimpadancá, cha atše chašotsinÿenama.

<sup>31</sup> Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusalenoquënga Bëngbe Bëtsábenga, tšabá chamóyëngacñama ndayá chënga jujabuáchama chajáftsayentšbuachiye ora.

<sup>32</sup> Y chentšana, y Bëngbe Bëtsá chca chaojábošenëse, atše chayobená bëtscá oyejuayá tšëngaftangbioca jashjanguana tšëngaftanga jánÿama, y tšëngaftangaftaca chaitsemna ora, batšá jóchnama chayobená.

<sup>33</sup> Atše, Bëngbe Bëtsá sëntseimpadana, nda inétsama bënga ainaniñe tšabe ebionana chamot-

sebomnama, n̄yetsca t̄šēngaftangaftaca chaotsemnama. Chca chaotsemna.

## 16

### *Ubuátmēnga jacheuayama*

<sup>1</sup> Atše sēntseboše t̄šēngaftanga jáuyanana Febe, Jesucristbeyeca bēngbe uabena, can̄ye t̄šabe entšá endmēnama; cha chē Cencrea puebloca enefjuana ošbuáchiyēnga endújabuachana.

<sup>2</sup> T̄šabá cha šmochjofja, mo can̄ya Bēngbe Utabnábia quetsomñecá, ntšamo Bēngbe Bētsabe entšanga entsamncá ín̄yēngaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átšbioynaca.

<sup>3</sup> Atšbe cuenta Prisca y Aquila šmochjácheuaye, chē átšeftaca tbonjatrabajata, Cristo Jesusbiana oservéniñe.

<sup>4</sup> Jobanámnaca bonjanprontana, atše jatsbocama, ndoñe chašmondóbama. Atše chama chata sēntsatacheuaná; y ndoñe n̄ye atše, sinó n̄yets luarenache enefjuana ndoñe judiēnga ošbuachiyēngnaca chca.

<sup>5</sup> Chē ošbuáchiyēnga, chē Bēngbe Bētsá jētschuayama chatbe yebnentše jénefnama imuamanēngnaca, šmochjácheuaye. Atšbe bonshana Epeneto šmochjachuaye; cha endmēna chē natsaná Asia luaroca Jesucristbeñe jtsošbuáchiyama.

<sup>6</sup> María šmochjachuaye; cha t̄šēngaftangbeñe bētscá tojatrabajá.

<sup>7</sup> Chē cach atšcá judeocata Andrónico y Junias šmochjácheuaye. Chata can̄ye ora átšeftaca cárceloye bonjanētámēna, y Jesucristbe

ichmónëngbiana chata puerte uámanata bonjamna, y atšbiana más natsana tbojanontsé Jesucrístbeñe jtsošbuáchiyama.

<sup>8</sup> Ampliato šmochjachuaye, atšbe bonshaná, er atšcá cha Bëngbe Utabnáftaca cánÿiñe mo canÿacá bondmëna.

<sup>9</sup> Urbano šmochjachuaye, chë bëngaftaca Cristbiana oservëniñe trabajayá; y atšbe bonshana Estáquisnaca šmochjachuaye.

<sup>10</sup> Apeles šmochjachuaye; cha ba soye tonjinÿanÿé Jesucrístbeñe puerte yošbuáchema; y Aristóbulbe yebnentsëngnaca šmochjácheuaye.

<sup>11</sup> Chë cach atšcá judeocá Herodión šmochjachuaye, y chë Narcisbe pamillentšana Bëngbe Utabnábeñe ošbuachiyëngnaca.

<sup>12</sup> Trifena y Trifosa šmochjácheuaye; chata Bëngbe Utabnabiana puerte bondëtrabája; y bëngbe bonshaná Pérsidnaca šmochjachuaye; cha bëtscá endëtrabája, Bëngbe Utabnabiana oservëniñe.

<sup>13</sup> Rufo, chë Bëngbe Utabnabiana uámana trabajayá, šmochjachuaye, y chabe mamánaca; cha mo atšbe mamacá endmëna.

<sup>14</sup> Asíncrito, Flegonte, Hermes, Patrobas y Hermas šmochjácheuaye, y chë ínÿenga Jesucrístbeñe ošbuachiyënga chëngaftaca imnënutanangnaca.

<sup>15</sup> Filólogo y Julia, Nereo y chabe uabena, Olimpas y nÿetsca Bëngbe Bëtsabe entsanga chëngaftaca imnënutanangnaca šmochjácheuaye.

<sup>16</sup> Nÿetscanga mo Jesucrístbeyeca catšatangcá šmochjenchuaye, jtenámochëse, ntšamo cach tšëngaftangbe pamíllanga puerte bonshanánaca

šmondbetsacheuanaycá. Njets luarenache ene-  
fjuana Crístbeñe ošbuáchiyënga cmontsacheuaná.

17 Jesucrístbeyeca catšátanga, atše cbont-  
saimpadana tšabá šmochjuáfšna y cuedado  
šmochtsebomna chë cányënga ínÿengaftaca  
contra chamotsemnama y ínÿënga Jesu-  
crístbeñe ošbuáchiyana chamotsajbanama  
imnétsamëngbiama; chëngna, chë tšëngaftanga  
ndaye šmojóyëngacñe buatëmbana soyëngama  
contra jtsóyebuambnayana.

18 Er chca amënga, ndoñe ntsentšénana Cristo  
Bëngbe Utabná jtseservénana, sinó jtsamana  
ndayá cachënga tmojtsebošcá, nÿe cachëngbe  
cuerpama tšabá tojtsemncá; y tšabe y botamana  
palabrëngaca chë paselo jáingñama yomna  
entšanga jáingñana, chëngbe ainaniñe chëngcá  
chamotsejuabnama.

19 Njetsca entšanga tmojouena, chë  
Bëngbe Bëtsabe soyëngama ntšamo ínÿënga  
tcmojabuatambacá, tšëngaftanga corente  
šmnétsayaunanama, y chíyeca atše puerte  
oyejuayá tšëngaftangaftaca séntsemna. Atše  
séntseboše, tšëngaftanga tšabá chašmotsetátšëmbo  
jtsamana ntšamo tšabá yomncá, y ntšamo bacna  
soyënga jamamna chašmotsemna mo ndoñe  
cuaftsetatšëmbcá.

20 Y Bëngbe Bëtsá, nda inétsama bënga  
ainaniñe tšabe ebionana chamotsebomnama,  
ndoñe bën y echanjama tšëngaftanga Satanás  
chašmoyënjanama, mo cha tšëngaftangbe cucu-  
atšiñe cuafjaboshjoncá. Atše séntseimpadana  
Bëngbe Utabná Jesús, chaoma tšabe bendicionënga  
tšëngaftangbeñe chaotsemnama.

21 Timoteo, chë átšeftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

22 Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñecá.

23 Gayo cmontsacheuaná; atše Pablo chabe yebnentše posada sëntsebmna, y cha enduamana nÿetsca chë muentša ošbuáchiyënga tšabá júbuajana. Erasto, chë quem pueblentša crocénana bojanÿá, tšëngaftanga cmontsacheuaná, y Jesucristbeyeca bëngbe catšata Cuártënaca.

24 Atše, Bëngbe Utabná Jesucristo sëntseimpadana, cha chaoma tšëngaftangbeñe tšabe bendicionënga chaotsemnama. Chca chaotsemna.

*Quem tsbuanácha juapochócama, Pablo Bëngbe Bëtsábioye tbojtanchuá*

25 Bënga sempre mochtsinÿanÿnaye Bëngbe Bëtsá puerte uamaná yomnama. Cha endobena jamama tšëngaftanga puerte chašmotsošbuáchema; y chca, cha echanjama ntšamo chë bënga fsëndabuayiyiná tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanyé ndegombre soyënga yomncá. Nÿets tempo mëntscoñama, Bëngbe Bëtsá chë soyënga entšanga ndoñe tonjinÿanyé, y chë causa chënga chë soye ndoñe ntsetatšëmbuana.

26 Pero morna, ntšamo Bëngbe Bëtsabe juabna oyebuambnayënga tmojanabemcá,



tojama bĕtsá entsanga chĕ ndegombre soyĕngama chamotsetatsĕmbuama; Bĕngbe Bĕtsá, chĕ nĕets tempo vida bomná, tojanmandá entsanga nĕets luarĕnguenache chĕ ndegombre soyĕngama chamotsetatsĕmbuama, chĕnga chábeñe chamotsošbuáchema y ntšamo cha yobošcá chamotsamama.

<sup>27</sup> Nĕe canĕe Bĕngbe Bĕtsá endmĕna, y cha nĕets osertánana endbomna. ¡Nĕetscanga chamotsinĕanĕná cha puerte bĕtsá y uamaná yomnama, ndayá Jesucristo tojanmama! Chca chaotsemna.

## **Bëngbe Bëtsa Cabëngaftaca Entsoyebuambna New Testament in Camsá**

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Camsá

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
19104c0e-9046-5ff3-82fb-eb838c88dcf9